


MAPWIYA, NAAPHAVELA

OMOONA YESU

 Nuurame muru ahu vano wira nivekele.

² Tith'ihu a Wirimu, hiyo ninnooxukhuruni Nyuwo, ohiy'ula, mwaha wa anatiri hiyo nirin'ahu mwa nsipo nla. Hiyo ninniweya omoona mmiravo nacile ni nantiirya ole, tiithi awe orwaaka okumana ni Nyuwo, ni oovekelakani wira mmoriwe ikharari. Nto Owo khwira, “Miyu kinniweya mwaaweryaka waamini. Sothene sinniweyaneya w'ale anaamini.”

³ Nyuwo mooniroromeliha wira khimwaarowa onihya wala oninyanyala. Yoolepwa enihimya wira Nyuwo mwa mmosaru nsana, olelo, ni mahiku othene. Ni Nyuwo tthiri munnitthuna, ohiy'ula, ovonihya iretta sahu ntoko Nyuwo saatthunne-anyu okathi ule, maana Nyuwo mwa mmosaru. Ni Nyuwo moohimya mwa Masu Anyu wira itthu Nyuwo sivanryaanyu, nave-tho hiyo naanvara. Owo ti natiri Anyu, ni hiyo noosuwela wira eyo ekeekhai.

⁴ Vano anatiri ala othene aalupale, Pwiya, emaliheriwe wa an'Inyu ohiy'ula, wira khula mmosa aakhele etthu awo arwenyaaya. Nto okathi muteko ommalaaya ohiy'ula, ni nirowa mmawanyihu moohiyana-hiyana, nilavule yoohiru ntoko ale yaakhumme Emawusi nihiku nle. Nyuwo mwaahetta ni yaawo nihiku nothene, nave awo khayoozuwenleni. Masi ohiyu yoole, okathi Nyuwo mwaaryaanyu ni yaawo paahi mpaani, mwaahiira etthu siiso ntoko Nyuwo siiraly'anyu muhinatthi okhomeliwa, etthu emosa mutthu mukina ahiiralyaawe siiso. Vano awo yaahisuwela mwa *yeela* wira Nyuwo mwaahiira, wira Nyuwo mwaari Kristu ohihimunwe. Nto awo khwira, “Khinoona murim'ahu oniviha okathi Owo aalavulaawe ni hiyo mphironi?”

⁵ Hiyo ninvekela wira Nyuwo mutthikele wa hiyo, ohiy'ula, Pwiya. Atthu ala vakhani paahi, masi Nyuwo muhimmye wira, “Anli wala araru yathukumana mwa Nsina Naka, Miyu kinookhala eriyari aya.” Owo ti natiri Anyu, Pwiya, ni hiyo ninnaamini wira eyo ekeekhai. Ninoolipelela vano, mwa Nsina na Pwiya Yesu, wira elipiheriwe Masu Anyu. Amen.

Mukilaathiki.

[Munna mmosa onnilaleerya y'eprofeta—Mol.]

⁶ Amen. Naaxukhuru Atithi ahu a Wirimu mwaha wa mutumereryo owo muulupale. Moota entthuney'aya oniiriha hiyo wona, muteko ohinatthi opacerya, Owo oonivaha natiri mwa erooho y'oprofeta, wira ninoorowa omoona Owo eriyari

ahu va. Vano, ti siiso? Vekeekhai ti siiso. Enikhuma wa Muluku. Etthu p'itthu enoorwa ekhumaka wa Muluku okathi wothene ti yooreera. Nittotopeliwe Nsina n'Apwiya.

⁷ Miyo nkireere oxukhuru mwaha w'okhalaka okathi Erooho ya Muluku eryaaya eriyari y'atthu Awe, yiihanaka, evalaanyaka Ekereja wira eroihe Owaani, wa ale ahanle anrowa ohiiwa elapo ya vathi okathi Owo onirwaawe, wira yaakheliwe Wirimu. Tivo kinnixukhuru mwaha wa yeeyo.

⁸ Oh, ola okathi muulupale. Miyo—miyo kinnitthapa okhalaka va. Nyuwo moosuwela, Moise aamphenta wira okhanle-ene okathi yoola. Arummwa othene waamwaasivela wira ekhalaka okathi yoola. Nto hiyo nri va, nikhalaka okathi ula, ni nikhalaka vathi va mireerelo sahu. Moota Muluku onthunaawe waareeriha atthu Awe.

⁹ Vano, moosuwela, nooleeliwa wira nihiku Apwiya anrwaaya, enrowa okhala ntoko yoohiwehereriwa, ni ekereja yaarowa okhala eriiryaka. Ni kinoomaliharuru, otapernakulu waka owaani, ni o—okathi mithanu na miili sa ekereja. Ni enookhuma. . . eri mufiitani vano, ni ti, miyo kookuxa khula okathi wa ekereja, khula ohiyu, khupaka *Okathi Mithanu na Miili wa Ekereja*, thanu na piili sookiserya. . . mithuko, ni anamitthaka athanu n'aali a okathi wa ekereja ni. . .

¹⁰ Miyo, mwa sothene. . . miyo nkikhalanxe mulaleyi, masi sothene miyo. . . wiilipiha wothene kinihelelaaka mwaha wa Apwiya ekumi aka yothene, nkinikupali wira yootoko okhala yooreerela ntoko saaryaaya ele.

¹¹ Okhala wira kimalakaru orwa, ni kihisuwelaka moota wo okweretha okathi iye sa ekereja vakwaaturu, yooniheryaka paahi moota Erooho Yoowaarya jaarwiiye-aya Okathi wa Ekereja ya wEfeso, nto erowaka mpakha Simirina, ni Perkamu, ni Tiyatira, ni siiso, nto vakhala wira Nlaikha n'Apwiya, Waarya iwe, Nlo naahirwa ohoolo w'atthu imiya tthaaru, khweetta Nneene nirowaka mpakha vaxirini, khukweretha ni Waarya iwe woorukurerya, siiso miyo kikwerenthe-aka ikereja, ni khooniherya oratta-ene iyiixeryo imosaru ni sothene, okathi nivinre-aya, atthu imiya tthaaru ekhuwelaka, ni yinlaka, ni ewehaka Nenlo epantte ya exiri. Vano, Nlo neemenle va, ni khwiisooniherya Mmansaya vaxirini khupaka etthu ene yeeyo.

¹² Ni awo aakhalana eyo yookwerethiwa vano, mwa ilatarato, ni emphwanyaneya mutapernakulu. Mwenye Arganbright, munn'ihu oophentiwa oophwanela, onoomaluru okhuma vale, oronwe oweha, vaavo vaary'aya-vo vaxirini.

¹³ Hiyo ninkhala okathi muulupale. Masi kinimoova wira khani. . . nihaana wiitiina vakhani ni wiittikinya vakhani wira nisuwele paahi vary'ahu.

¹⁴ Miyo imaara sinci-ene kinnihimyaka, ni ohimya moonelo ola: Kinniphwanya mixovo miili s'atthu keettaka mukwaha

molumwenkuni. Awo ti aPentekosite wa mmosa, ni a voophaveleya wa ekina.

¹⁵ Vano, atthu a voophaveleya mwa mukhalelo vopuroni annisuwela etthu awo akhanly'aya mwa Kristu mwaha wa natiri a Bibilia, masi awo khayaakhenle Erooho Yoowaarya wira esuwele awo t'ani, wala, okhalana waamini. Vano, atthu aPentekosite ahaakhela Erooho Yoowaarya, masi awo khansuwela t'ani awo. Munnona? Tivo eri ntoko mutthu orina musurukhu opanko, nave ohinsuwela moota wo olepa exeeke; owo mukina onniwerya olepa exeeke, nave khorina musurukhu opanko.

¹⁶ Vano, vaakhanle wira munniwerya okhalana iyo piili vamosa! Vaakhanle wira atthu aPentekosite yaamuwerya wiilokiherya! Ntoko sihimaly'aka nsana ohiyu (vekeekhai kinnaamini yeela ni murim'aka wothene.), ekereja ya Pentekosite yaari mmukhaleloni wooreera . . . Miyo—miyo nkaari murumeyi mahiku ale, ni nkinoona wira kaari yoowo, alakela nkaari mulaponi mahiku ale. Masi mithukumano sa khalayi sa Ephiro Azuza nyuwo muhinreere-anyu ohimya, ni miyo koosoma iliivuru saya, ekereja yoopacerya ya Pentekosite, iyaakha miloko miraru wala miloko mixexe ottuli, yaari mmukhaleloni wooreera wa orwa w'Apwiya ovikana siry'aya naanaano va. Vekeekhai awo yaari aKristu ni inawu vathi, ni yaanithara makhalelo a yeeyo. Awo yaanaamini.

¹⁷ Vano, hiyo *nihikawanya* mixovo, ni nookhalana mitthenkeso sahu ni miromolelo sinkhala soothanleliwa mwa mixovo. Ni nihaana axisuulu mwemmo anikelihiwa mwaha wo okhalihwa aana ni siiso. Hiyo khanrina nloko na khalayi na aPentekosite yaakhwaaka ni vekeekahi orwa ni Muluku, waamini iwe w'ekeekhai wooloka. Awo yaanvekela Muluku paahi, ni waattikitthela makhura, n'ukelela ohoolo n'uvonihwa.

Olelo Muluku onoowerya okhuruwa ni wiisooniherya Mwaneene va mwiiriirya, eriyari y'atthu ni sothene, nto, aniira paahi, "Ahe, kinoona wira khiyaareere oreera."

¹⁸ Khimureerane mwiixuttiho, mphavelaka waarya wa naanaano. Ti yeeyo Hawa aaphavelaawe okathi waakuminheawe maitho awe. Moone, mutthikele mBibiliyani mukhale saana ni etthunelo ya khalayi. Muhihye ephiro ele ya khalayi ya ophenta yoopacerya, ni etthu yoopacerya enoorwa wa nyuwo. Mukhale ni Erooho Yoowaarya. Muhikhume murowelaka eviruwelo ekina. Mukhale ni Muluku, mwa Masu Awe. Nto Erooho Yoowaarya khenkhalakhala yopakihakani etthu evirikanne ni Masu ala. Enookhala voolikana mwa Masu, okhala wira ma—Masu ti Muluku.

¹⁹ Nsana ohiyu kaalavula mwaha wa *Iwehereryo*, nto ohiy'ula, kaarowa waavekelela aretta. Vano, mwa mpantte onoorwa, woottharelana, meelo ohiyu, nintthuna nipacerye enamuna ya

onamalaleya ya Mutthaka, khino *Orwa w'Apwiya, Ekanyeryo Ya Nxeni, Ekanyeryo Ya Muluku, Atthu Ikonto Emiya ni Ikonto Miloko Mixexe n'atthu ikonto xexe, Anamweettiha a Ikhavalo Xexe Sa Wisuupulula*. Vano, kinnaamini wira mitthaka iyo ti sintthuneya wira naavahe atthu, wira saavenxe, saattikinye, siwooniherye wira hiyo. . . Miyo kihoona iphwanyeryo suulupale mwa *Okathi Mithanu na Miili wa Ekereja*. Miyo kaanvira-tho mwa yeeyo, kuupuwenle-ru wira yaamukhaliherya va. Moota e. . . Muluku aahireeriha.

²⁰ Vano, mukihye kaalopole atthu, emaara ekina ni ekina: Muhiwehereryeke wira ottikinya wookiserya wa Muluku Mukereja onookhala etthu ya mulaponi mothene. Khunrowa okhala. Ti wa Ekereja. Ti itthu suulupale sinrowa waakhumelela atthu ooyeva vakhani. Nlo nikhuru naamukhaani Muluku onttikinyaawe wira nikhale noolikana, nirowe. Awo aarowasa khula enamuna. Munnona? Vano, eyo ti Yoolempwa ni Bibilia.

²¹ Woohikhala khalayi pastore mmosa a epooma emosa yuulupale aahikirweela, nto owo khwira, "Ahe, kinimuuluvala." Khwira, "Miyo kinnikhalaka nno miyaakha miloko miili n'itthu, ni hiyo ninnikhalana mthukumano mmosa wa oweryaxa." Iwo oChicago, ti Mattsson-Boze.

²² Owo khwira, "Miyo kinnilipelelaka, Munna Branham, ni orwa nno ni kaahikhalana yoolaleerya y'eprofeta yookhuma wApwiya kaarwiiye-ru nno, kaamoono ntata na Muluku na ikuru ottikinya nipuro nla ohinatthi okathi wo okhuma."

²³ Miyo khwira, "Munna Joseph, vaxariya-vo," miyo khwira, "nyuwo mwa teyooloku muulupale, ni mwa mutthu muulupale a. . . Totori a oMuluku. Khuuvo hata ohoverya wa yeeyo. Miyo nkaarowa owerya okwannya." Masi miyo khwira, "Masi munn'aka oophentiwa, nyuwo mookhalana othokorerya wa erooho wooyeva."

²⁴ Ti vaavo ekereja envonyaaya-vo olelo, ti othokorerya iwe wa erooho wira yoone etthu Muluku eniir'awe. Ni awo anooweha vasulu saana wa etthu va eniiraneya vaava va, ni enimoovirani nyuwo muhinatthi osuwela.

Yesu khaahimye mwaha wa Yohani. . . ? Awiixutti yiirale, "Mwaha wa xeeni alipa-oolepa ikano ohimyaka wira Eliya ohaana toko orwa?"

²⁵ Owo khwira, "Owo ohoorwa nave awo khuhimusuwela." Ti yeeyo. Awo khanasuweleke wira Eliya aari profeta, vekeekhai, masi Ekereja paahi. Awo khiyaarowa wira emweettinhe, khiyaarowa omwiihana, "nantari," ni wira siiso. Awo khiyaasuwela.

²⁶ Awo khayaasuwela wira Yohani aari vekeekhai profeta a Muluku. Awo yoona wira owo aari mulopwana mmosa mulolo mothakoni mme, aaphavela waapwiniha atthu mmaasini. Masi owo khonaroweke mpooma n'itthu. Owo aakhala ota mothakoni,

ootikiniha, oomeekha. Nto awo yona wira aari namathipelela, enamuna owo aawaraawe. Masi Ekereja, Ekereja yoowihaniwa, ele yaaihaneliwe woona eyo, awo yaahisuwela naanaanoru wira owo aari profeta.

27 Awo khayaasuwenle wira Yesu aari Mwaana a Muluku mpakha Owo okhwa, khuvithiwa, khuhihimuwa. Anci-ene aya khansuwela eyo hata olelo. Eyo ekeekhahi. Awo khanasuweleke, awo . . .

28 Ekereja Katolika khenamwaakheleke Patrisiyu Oowaarya. Ixikola sawe sothene saari wIrlanta Onkela epheyo. Owo aahaavaanyiha mapixipu aKatolika, nto vano awo animukhaliha santu. Vano, ekereja Katolika yoompaha Yohana a wArc, anlaka vanipottoni, okhala wira awo yaahimya wira aari mukhwiri. Mwaaruusi owo aanoona soowoona. Owo aari murumeyi a Muluku. Miyaakha soophiyaka emiya ohoolo waya awo khikupali iyo, okhwiyeene ni khuvithiwa. Vano awo khurukunxa murima, khuthipula irutthu iye sa maphaatiri yaamwiivale, khurihela mmurathhini.

29 Awo khanasuweleke eyo mpakha eyo ovira, nto Erooho Yoowaarya envaha Ekereja wihaniwa waya wookiserya vano, ni wira siiso ntoko Bibilia sihimaly'awe wira yaamwiira, nto aPentekosite animwaapapela vasulu vaya, ewehereryaka etthu. Oh, wulu. Muhiire siiso, xontte.

30 Nwiriyaane. Vakhala wira nimmuwehererya Kristu orwa . . . Nyuwo munnaamini yeeyo? Ahe, vakhala ti siiso, nrowe niireke ntoko siiso. Ninwehererya sayi Kristu orwa, nave khunahela itoolare imilyawu thanu na mosa mwa yooteka? Munikhalanelani itthu iya suulupale, mulavulaka mwaha wo orwa wa Kristu? Vano, munna, hiyo naahaana, okhala, nikuxaka, niilikanyihaka mwaha wa Okuxiwa, kahi wa miyaakha imiya thanu sikina okhala muumu elapo ya vathi. Munnona?

31 Yookhala etthu ehilonke. Eyo khenoototha mwa enamuna emosa. Eyo kheni—eyo kherina maana wa miyo. Ni mihokorokho saya . . . Nyuwo pooti ohimya ni iyano sanyu, woohikhala ni murim'anyu. Munnona?

Nyuwo muniira, “Oh, ayo, kinnaamini wira Kristu onimoorwa.” Masi mwiirelo anyu onooniherya voovirikana.

32 Ankhi mulopwana aahimeenrye amwaar'awe wira owo onnaamphenta vano nto khunakhuma ni muthiyana mukina. Munnona? Soowiira sinnilavula vancipale ovikana moolumo. Ti yeeyo. Khincala ele enihimyaahu ni iyano sahu, soowiira sahu sinnooniherya ele vekeekhai eri mmurimani mwahu. Ti yeeyo Yesu ohimmy'awe: “Anawoothe, munwerya sayi ohimya itthu sooreera? maana eyano enlavula itthu isareiyi mmurimani,” Munnona? Nto yaahikhale siiso, vano eyo enamirima miili. Vano munnoonna vatthu Muluku aarowaawe onihelela-vo? Okathi ene

yoowo wa Ekereja ya Lawotiseya, yookuttihiwa, elavulaka ni eyano aya, masi murima aya ori ottaiwene saana.

³³ O Muluku, nrowe nittikinyeihe etthu iyo ottuli. Nrowe niphiye wa Muluku. Nrowe niphiye mwa Yoolempwa ni niphiye vaavo mpakha vekeekhai nimuttikiherye Pentekosite mmurimani mwa mutthu, kahi otthikela mmutthenkesoni, masi otthikela mmurimani mw'atthu mmitthenkesoni. Munnona? Ti yeeyo erinaahu wira. Tivo Muluku anikhaliherye esumana ela wira yeeyo.

Kinrowa ovekela, kitthukaka, kimulipelelaka Muluku. Kintthuna kivare mpantte aka kiri-ene wenna oCalifornia. Nyuwo nvare mpantte anyu. Mukhume mwaakelihe atthu.

³⁴ Muluku oniira itthu suulupalexa olelo sihinatoko aya wooniwa okhuma okathi Yesu Kristu aary'awe elapo ya vathi. Ti yeeyo. Nto enoorowa ovira vamuru v'atthu, vano awo anoovonya woona eyo. Eyo ti epantte yoonanara.

³⁵ Vaakhanle wira awo yaanisuwela paahi, ntoko Yesu sihimalyaawe—sihimalyaawe mwaha wa e—e...khwira, “Vaakhanle wira mwaanisuwela nihiku nanyu paahi, vaakhanle wira mwaanisuwela paahi! Yerusalemu, Yerusalemu, imaara kavi Miyo kitthunne aka woophuramwelani, ntoko mwalyakhu onaaphuramwel'awe axaan'awe, masi nyuwo khuhitthuna. Vaakhanle wira mwaanisuwela nihiku nanyu paahi, othotoliwa wanyu!”

³⁶ Ti siiso siry'aya olelo. Kweekwe ennikhhalaka; ti yeeyo ekhanle vano. Vaakhanle wira naanisuwela paahi nihiku n'othotoliwa. Masi othotoliwa onoovira, vano atthu amphavela *va etthu ekina*. Nto naanaanoru, othotoliwa woomala, nto eyo eri vo.

³⁷ Masi ntoko Owo sihimaly'awe, “Khaavo onwerya orwa wa Miyo ehikhanle wira Atithi Aka aroomuruuha toko. Othene ale Atithi akivanh'aya animoorwa wa Miyo.” Amen. Oh, ti yeeyo ennikhalihi hiyo. . .

³⁸ Vano, hiyo ntoko olavula n'atthu vatthu okhanlyaahu owoonihaka saana. Masi etthu yooreera wira, yaakhanle-ene—yakhala etthu evonyeiye, nrowe nikumihe eyo mphironi toko. Nrowe niroihe etthu ene vathi vamulipiheryoni. Munnona?

³⁹ Mutthu mmosa aahikiirela woohikhala khalayi, murumeyi mmosa oosuweliwa saana, mmosa oophwanelaxa mulaponi, owo iirale, “Munna Branham, nyuwo khamunreere ovonya vanci-ene.”

Miyo khwira, “Mukilevelele, munn'aka, mukileele vatthu vaya.”

⁴⁰ Khwira, “Nyuwo khimunreere waapwapwelaxa atthu,” khwira, “nyuwo mwa, ntoko nlikanyiho, nyuwo—nyuwo kweekwe munimwaapwapwela a—athiyana mwa enamuna awo

anwaraaya, ni nyuwo okathi wothene munimuulumela *ela ni ele*.” Owo khwira, “Vanreerela muhiye yeeyo. Munoohonona muteko anyu.”

⁴¹ Miyo khwira, “Khula okathi Masu a Muluku anihononaaya muteko aka, Muluku, ohonone vahilekenle, okhala wira miyo—miyo kintthuna ohononiwe.” Eyo—eyo ekeekhai. Kintthuna kihimye etthu eri yoolikana. Masu a Muluku anniixuttiha yeeyo.

⁴² Nto miyo kiniira, “Muluku onivahe ominyala, ni atthu anrowa weemererya ekeekhai, vohicala ele enoorwa wala enrowa.” Ti yeeyo entthun’ahu. Ehapari yooreera kehiyo etthu ya nikenyeya; Ehapari yooreera ti y’alopwana, atthu oowiihaniwa ni Muluku.

⁴³ Muhimulamule mutthu mwaha wa moota yinnunwe aya matata awe, ni otaphuwa xeeni aryaaya makhata awe. Kinniwiwa awo wira, “Oh, owo kahi mulopwana.” Kinniwoonaka alopwana yaarilela ikhiilu miloko mithanu na mixexe ni nuusu, yahaarina hata ekaraama ya mulopwana mwa yoowo. Ti yeeyo. Khoniphimmwa mulopwana mwaha wa munnuwelo awe. Eyo ti yoohilikana. Oniphimmwa ni mukhalelo wa murima awe. Khonakhaleke Mulopwana a mukhalelo wa murima wooreera onvikana Yesu Kristu.

⁴⁴ Erutthu yuulupale, ekhomaalelo ya mwaapuuru onvikana khula mulopwana, tivo khimwaakhanle, wala etthepo, vano, nyuwo. . .yaamukhala yoohilikana. Masi mulopwana kahi wunnuwa xeeni wa mitika orinaawe. Miyo nkinimphima ni yeeyo, masi moota malepa aryaaya mmakuthani mwa ikalsa sawe, vaavo owo aaryaawe ovekelaka. Owo ti mulopwana onthhunea ophimmwa: mukhalelo wa murima.

⁴⁵ Yesu aari Mutthu ooyeva, Mutthu mwaamukhaani, khino oomora makhata. Ni miyaakha miloko miraru ni miraru, Owo aakhala wira aarina miloko mithanu, Bibilia oohimya. Masi khonakhaleke mutthu elapo ya vathi ntoko Yoowo, ni khonkhalakhala okhalaka. Owo—Owo. . .Bibilia ohimnye wira, “Khiwaakhanle oreera wa Yoowo wira—wira nimutthuneke. Naamoonaka Owo naaniipithiha, p’uhimya wene, owiitho wahu wa Yoowo,” ni sothene siiso.

⁴⁶ Masi nnakhala vo, yoomusivela Muluku o—omunyakatta Owo. Nto Owo aahinyakattiwa, omaniwa, ni ohaaxiwa. Owo oovilela sootheka sahu, onyakatteliwe mwaha wa sootakhala sahu, ni makhwatta Awe t’anivoninhe. Oh, eyo yaahaana waakuxa murima atthu. Vekeekhai yaahaana. Eyo yaahaana otuphiha murima.

⁴⁷ Masi moosuwela mulattu ene xeeni? Hiyo nirookumiha muthukumano wa mavekelo wa Namararu ohiyu, khuhela-mo epokrama ya televisawu enaathweeliha atthu othene. “Nto vari murima, vari mihakhu, ni murima ori vaavo.” Nto exeeni eniwiiriha atthu othuna orowela itthu sa molumwenkuni? Ahe,

miyo...Moosuwela, etthu muniirelaanyu yeeyo? Ti...Etthu atthu aniirelaaya yeeyo? Etthu enimwiiriha mutthu otthuna ohapaliwa? Etthu eniwiiriha atthu wira ntoko siniir'aya? Olumwenku. Xeeni mutthu aarowaawe ohala owaani Namararu ohiyu ohiya orowa omuthukumanoni wa mavekelo, wira omooneke prokrama mmosa a mutelevisawuni, yaarowa wiirela exeeni yeeyo?

⁴⁸ Okhala wira yookhala etthu mwa yaawo entthuna osivelihwiwa. Awo antthuna...Nookhala nipuro naamukhaani mmurimani mwa mulopwana wala mmurimani mwa muthiyana, ni Muluku nipuro nlo oipakenle Yoowo. Muneererya sayi nyuwo ophavela okuxa itthu sa molumwenkuni ni ohela mwemwo vaavo Muluku oipakenlyaaawe Mwaneene wira okhaleke-vo.

⁴⁹ Muluku ti ohakalala wahu. Muluku ti opuha wahu. Muluku ti otteeliwa wahu murima. Eyo ti ya vaavo, *muhina* mu; mmuhiye Muluku akele, vano nto itthu sikina ti sookhwaxa, hata muhinicaliwaanyu-tho ni seiyo.

⁵⁰ Oh, atthu khareere okhala anatiini, kweekwe annikhalaka. Ntoko saalaleiye-aka ohiyu umosa iwe, muhakalaliho kweekwe onikumiherya maphapo, ntoko Esawu ni Yakope: mutthu a molumwenkuni, ni mutthu ontthuna eyuulupale. Munnona? Kweekwe, onkhalaaya khula muhakalaliho onikumiherya yeeyo.

⁵¹ Nihiku nla nookiserya, muhakalaliho ohiira etthu emosaru. Eyo ekeekhaii. Tivo nrowe nimukuxe Yakope, ole onrowa orithi, ole onrowa okela, muttetthe wa natiri. Ni hiyo khanikhanle okhala oosivelihwiwa ni orowa ekereja paahi ni ohela nsina nahu muliivuruni. Naakhalaka siiso, yookhala etthu ehilonke. Nrowe nitthikele niwelaka osulu ni osulu, mpakha niphaye muttetthe ole wa natiri.

⁵² Kilaleyaka nihiku nimosa vamuthukumanoni w'aLipa a Nakoso aKristu oPhoenix, Arizona, wu mu—musaala mo wiiniwa, miyo kiirale, "Isarayeli aawerya wuupuwela vakhani, okathi awo waakhuwel'aya ni yinaka Muroohoni, ni Miriyamu ni ekoma ele vaamanlyaaya olapuwa Ephareya Yookhwa, khuwoona makapataasi okhwa ottuli waya, awo yuupuwela vakhani wira yaari miyaakha miloko mixexe ottaiwene wa muttetthe wa natiri." Awo khiyaawerya waamini yeeyo. Awo yaari mahiku oophiyaka maxexe paahi ottaiwene.

⁵³ Masi awo yaahaana okhalana emosa, moosuwela, yaahaana orowa mpakha Okhuma 19 n'uvonya waya wuulupale awo yaatonko aya wira: yaahaana orowa ni ophwanya ikano, wira ewerye onyakulihana ni wiitthokiha, ni wiitakanxa vamosa.

⁵⁴ Mahala yaahaavaherya profeta. Mahala yaahaavaherya mwaapwittipwitthi. Mahala yaahaaveherya miiriiry. Mahala yaahaavaha muhakalaliho muulupalex awo yaatonko aya okhalana. Mahala yaahivaherya itthu iya sothene, nave nnakhala vo awo yaatthunne ikano.

55 Vekeekhai ti vaavo axitiithi ahu yaary'aya oPentekositeni miyaakha soophiyaka miloko mixexe sivinre. Mahala yaahivaherya. Awo othene yaari ni mwiiwanano mmosa. Khula... Pentekosite aari Pentekosite. Masi khivaaweryaneya awo okhala oosivelihiwa, eyo. Awo yaahaana wiitthokiherya nikhuru nniihaniwa Asempeleya a Muluku. Nnari, awo yaahaana okhala nikina: Ekereja ya Muluku, ya Ikhomo xexe, Unisista, a Neenli, a Neeraru, Vaxexe. Ni nyuwo munnikhala mukilaanthe vale mwa miyaakha miloko mixexe. Muluku amoriwe ikharari. Hiyo ninnitthuna e... .

56 Ahe, awo yaahikhala iwe mpakha atthu ale othene jaarina enamuna eyo ya muupuwelo okhwa. Vano nihiku nimoso, Yoxuwa khuyenya, khwaahelala miyoono sawe awo othene, nto Muluku khwira, "Nyuwo munnikhalka vamwaako va okathi munci-ene. Vano, nrowe onkela epheyo, ninoolapuwa, namukuxe natiri."

57 Muluku onniwerya waakuxa aPatista, wala aMetotista, wala etthu p'itthu Owo onthunaawe. Masi mutthu onoorowa epante ekina. Ti yeeyo. Nto vaakhalakaru wira nirina miyuupuwelo sahu sa ilimalelo ni ohelela vaavo wira hiyo n'a... Oh, munookhala vaavo. Eyo ekeekhai tu.

58 Oh, nrowe nivenye. Nrowe nikhume mwa yeeyo. Wulu, mwiitathe ni musuwele wira Muluku nlelo Mulukuu, Owo ookhala, ohaana okhala, vakhala wira Owo aahinto okhala Muluku, Owo nlelo Mulukuu. Owo khonrukunuwela inamuna sahu. Hiyo nihaana, orukunxa inamuna sahu nikuxaka Sawawe. Oh, miyo hata nkaatthuna ohimya yeeyo. Miyo paahi... .

Miyo—miyo kinoosoma Yoolempwa emosa vano. Vaareera. Yohani Oowaarya 12:20. Kinrowa osoma paahi eversiikulu emosa va.

*Nto yaahikhala aKereku eriyari ya ale jaarwiiye o... .
oniirani... .okokhorela:*

*Awo yaahirwa wa Filipe, yoowo aari a oPetisayita
a oKalileya, ... etthunaka wira owo, yiiraka, Mapwiya,
naaphavela omoona Yesu.*

Vano, mukhunle mwa aHeperi 13:8.

*Yesu Kristu mmosaru nsana, ... olelo, ni mahiku
othene.*

Akavi anaamini yeeyo va nttittimiho ni murim'anyu wothene?

Vano, meelo ohiyu ninrowa mmutekoni mwa onamalaleya ehapari. Ohiy'ula ninrowa o... hiyo ninlaleerya wa ovoniha wa Muluku.

59 Vano, yookhala etthu y'olavula mwaha wa etthu p'itthu, vano nto yookhala etthu ekina wiiriha ele hiyo nilavunly'ahu okhala ekeekhai. Ni awo othene Masu a Muluku, nto etthu emosa paahi

entthuneya waamini wira envarihe muteko natiri a Muluku. Ti yeeyo. Vakhala wira Muluku oomuhimya natiri, vano Muluku ohaana onviriha natiri Awe.

⁶⁰ Vano, kinthhuna wira mukivahe okathi anyu wothene minuutu vakhani paahi. Nyuwo mwakivaharu minuutu soophiyaka miloko miraru, nto nuumala ninrowa wiihana eliinya ya mavekelo, nto minuutu vakhani, ninoowerya orowa owaani.

⁶¹ Vano, etthu yoopacerya t'ila: Nyuwo munnaamini wira Yesu Kristu mmosaru nsana, olelo, ni mahiku othene? Munnaamini yeeyo, voottittimiha-vo? Owo mmosaru mwa malamulo? mmosaru mwa owerya? o—owerya omosaru Owo otonko awe okhalana? omoriwa ikharari omosaru? Owo aakhanle vaava, yeeyo Owo okhanly'awe olelo, Owo aamwiira voolikana siiso ntoko Owo siiraly'awe okathi waary'awe muumu khalayi?

⁶² Wala, munuupuwela wira nuuvira miyaakha ikonto piili Owo ookhala oosuwela-tho vakhani, oolavilavi vakhani, onnisuwela moota wo okhaliha ekereja yoovirikana? Ni Owo aahaana ntoko oveka muswammaha mwaha wa ele Owo iiralyaawe mu—mukereja Pentekosite toko, siiso Owo onnimukhaliha Owo ekereja yoovirikana ya Pentekosite y'okathi wookiserya? Owo waamukhala muupuwelo Awe?

⁶³ Kahi Owo akhalaru mmosaru. Owo aamukhalana miyuupuwelo imosaru. Ni Owo aari Muluku, tivo Owo khokhanle orukunuwaka. "Muluku aari mwa Kristu aataanihaka olumwenku ni Yoowo." Tivo Owo aamukhalana miyuupuwelo imosaru, malamulo mamosaru, owerya omosaru, ni Ekereja emosaru. Owo mmosaru nsana, olelo, ni mahiku othene.

⁶⁴ Vano, nihiku nimoso yaahikhala atthu kamosa-kamosa yahaatonko omoona Owo, yaaveveleiye ekelaka vamuthukumanoni, kiireke, orowa okokhorela oPentekositeni. Awo yaarimwiiwa sa Yoowo. Vano awo khimurweela mmosa w'arumeyi Awe khwira, "Napwiya, naaphavela omoona Yesu." Ni mwaha wo onvekela murumeyi ula, murumeyi aahaakumiherya awo Yesu.

⁶⁵ Vano, vakhala wira Owo mmosaru nsana, olelo, ni mahiku othene, ni nyuwo moovenxa matata anyu wira mwaanitthuna omoona Yoowo, vano xeeni hiyo ohiweryaka omoona? Eyo ti yookoha. Khaninwerya omoona? Owo aaryeene mmosaru, vano xeeni hiyo ohiweryaka omoona Owo?

⁶⁶ Nyuwo moovenxa ntata ntoko aKereku ale. Nyuwo mwaatthuna mmoone Owo. Miyo kinnivenxa ntata naka. Okisivela omoona Yoowo. Ni Owo oohimya wira aarowa okhala ni hiyo ni ohikhalakhala oninyanyalaka. "Miyo kiri ni nyuwo okathi wothene, mpakha woomalelani." Owo okathi wothene ori

vaava, mmosaru nsana, olelo, ni mahiku othene. Vano mulattu ene xeeni? Xeeni hiyo ohiweryaka omoona Yoowo?

⁶⁷ Vano, Owo arwa vale eriyari ahu ohiy'ula . . . Vano, nyuwo mwakhala muletto khino pooti ohisuwelaka ela saana, masi kintthuna wira mpurulele vathi ipantte, ni mukilaathi mmaale mu—muthukumano wothene, ni mwiiwe saana Masu ala, anatiri kinrowaaaka woosomelani, alempwe va . . . vapapheloni va, a mBibiliani. Nto miyo—miyo kintthuna koosomeleni anatiri kamosa-kamosa nisuwele vakhala wira Owo nlelo mukumii wala nnari, wira noone sinto etiini ahu y'eKristu ti etiini y'ekeekhai, ni vakhala wira muupuwelo ahu wa Pentekosite ya yeeyo ti weekekhai, wala ti woovonyeya.

⁶⁸ Hata, miyo kinnaamini, vano, hata soovonya saya sothene, miyo nlelo kinnithanla okhala ekereja, vano, kahi mwaha wo wira awo aPentekosite. Pentekosite kuhiyo mutthenkeso. Vano, nyuwo aPatista ni aMetotista muupuwele eyo, aKatolika ni Prespiteriyaano, khivanweryaneya omutthokiha Muluku. Khamunimutthokiha Muluku. Pentekosite musuwelelo aMetotista, aPatista, maPrespiteriyano, aKatolika, ni *othene* anaakhelaaya.

⁶⁹ Vano, miyo kweekwe kinnihimyaka wira, “Mutthu akhala muKatolika, nave onalipana ekereja Katolika wira oopowe, owo oopweteya. Ni owo akhala muPatista ni olipanaka ekereja Patista wira oopowe, owo oopweteya. Owo akhala muPentekosite ni onalipana ekereja Pentekosite wira oopowe, owo oopweteya.

⁷⁰ Masi owo akhala muKatolika onalipana Yesu Kristu, owo ohoopowa mwaha wo waamini, waamini wawe yoowo. Owo akhala muPatista, wala muPentekosite, anwehaka Yesu Kristu wira oopowe, okhala wira mwaha wo waamini munnoopowa, ni mwaha wa mahala a Muluku, eyo ekeekhai, omwaamini wanyu w'omeekha Yesu Kristu t'onwoopolani.

⁷¹ Vano, ela yakhala Eliivuru Awe . . . Kaahikhalana nvaanelo woohikhala khalayi ni phaatiri muKatolika. Owo aarwiiye owannyaka okoha vakhala wira kaahimpatisa mwali mmosa a . . . okathi waaryaawe ttuutthu, wala, mwaaruusi mmosa a miyaakha soophiyaka muloko ni mithanu, owo aahitheliwa, ni khutheliwa-tho muKatolika. Nto owo . . . owo aahaana ompatisa. Pixipu khukikoha sookoha kamosa-kamosa. Nto owo khukikoha sinto kaahimpatisa, nto miyo khimuleela, “Opatiiso w'oKristu mpwinihaka.”

Nto owo khwira, “Ekereja Katolika yaaniiraka yeeyo.”

Miyo khwira, “Liini?”

Vano owo khutthika khwira, “Mahiku a Bibilia.”

Miyo khwira, “Vano nyuwo munihimya wira bi—Bibilia ti . . . Ekereja Katolika t'emulempe Bibilia?”

⁷² Khwira, “Yesu Kristu t’othokinhe ekereja Katolika khimuhela Petru muru wa yeeyo ni arummwa muloko n’aili; nto eyo yaari ekereja Katolika yoopacerya.”

⁷³ Miyo khwira, “Nto vakhala wira ti yoohivonya, ni khenrukunuwa, sikhalelele-ni irukunxelo sinci-ene sipakiwe? Vano, nyuwo mookhalana athiyana ikonto muloko nno nyuwo munaavekelaanyu, athu ookhwa. Nto ori Mulapeleli mmosa paahi, ohimye Bibilia, eriyari ya Muluku n’athu, nto owo ti Mutthu, Kristu Yesu, kahi aMaria, wala hat’ethu ekina. Munnona?” Miyo khwira, “Mwaha wa xeeni?”

Owo khwira, “Ahe, moone, Mwenye Branham, hiyo khanirina onyakulihanaka Masu.”

⁷⁴ Miyo khwira, “Miyo nkinnyakulihana Masu. Miyo kinimookohani paahi.” Miyo khwira, “Miyo kihaana a*Papilooniya Aili* a Hislop. Kookhalana awahala a khalayixa kikhanlyaaaka waaphwanyana. Va ari *Axitithi a oNicea*, Muthukumano w’oNicea, Muthukumano Ohinatthi Nicea, ni othene, va moosomani mwaka. Mukoonihe vatthu ti vatthu vaakhanle-aya ekereja Katolika mpakha 305. Mukoonihe vatthu vaaryaaya.”

Owo—owo khwira, “Nyuwo munimuhimya wahala.”

⁷⁵ Miyo khwira, “Kinsuwela sayi wira aahikhala George Washington nno, mwaha wa wahala paahi? Mukoonihe ethu yoovirikana.” Munnona? Nto miyo khwira. Vekeekhai ti yeeyo. Muluku khonathhokiheke ekereja, ni khenakhaleke ethhokiheryo ya Muluku wira eyo. Ekereja maama a mitthenkeso ti Katolika, nto sothene saya sikina sinkhuma mmitthenkesoni seiyo voomutthariha Wisuupulula 17. Eyo ekeekhai voolikana. Ohonona opatthana. . .

⁷⁶ Hiyo othene nri mmosaru. Pentekosite ti wa Metotista, aPatista, muKatolika, Prespiteriyaano, “Ole ontthuna, orwe, owurye mwephattuweloni sa maasi a Ekumi mahala.” Ekeekhai. Vano, vaari wira Yesu ti. . .

⁷⁷ Vano, miyo nkinlavula kipwapwelaka mitthenkeso iya, masi nyuwo mwakweretha-ru ekintaali yaamukhaani orukurerya. . . Ntoko ethu yaamukhaani koonaly’aka emaara emosa, khole mwaamukhaani okilantthe-ene mmwirini. Nto owo iirale, aaweha akhole akina axikhaani, khwira, “Moosuwela awo annileela wira. . .annileela hiyo, ahiiso, awo anihimya wira vathi vale, wira—wira awo akhumme wa hiyo.” Owo khwira wira khaawerya waamini eyo.

⁷⁸ Khwira, “Kaahikhala ootekelelaka mwiri aka va wira mwaapar’aka khole ahiwerye orwa va ni orukula ekole owo otthunaka? Kaahikhala oohimyaka wira ka khole mmosa paahi okhanle mmi—mmirini?” Ahe, khwira, “Vakhala siiso, weeso nloko na akhole noomora.” Eyo ti wii, ahe, eyo ti yoooreera nave. Ayo.

⁷⁹ Neereryaka okuttelela etthu...Muluku khonkuttelela. Owo onoopwexakasa ikuttelelo, oopwexakasa ixiri varyari va minlaano ni, sothene mwa mmosa mwa Kristu Yesu. Erooho Yoowaarya ti ya hiyo othene, wira hiyo othene niwerye woona ovuwa wa Muluku.

⁸⁰ Mmthukumanoni mwaaka sothene nkinatoko omoona Owo wira, “Ahe, mulopwan’ola muPrespiteriyaano, tivo khokhanle ovonihwaka. Ni ola muPatista, tivo owo khokhanle ovonihwaka.” Owo khonaavoniha athu siiso. Eri va mulipiheryo wo waamini waya nave kahi muromolelo aya. Ekeekhai.

Vano, vakhala wira Owo mmosaru nsana, olelo, ni mahiku othene...Ekereja Katolika yaamwiira, “Vekeekhai, hiyo ninnaamini yeeyo. Hiyo ninnaamini yeeyo mukereja mwahu.”

Patista yaamwiira, “Hiyo ninnaamini yeeyo mukereja mwahu.”

Katolika yiire “Hiyo ninnaamini yeeyo” mukereja mmwe.

⁸¹ Vano, kaarowa olipiherya nuulumo nla vasulu va Patista, ekereja miyo onikhumaaka-wo...Kaarowa olipiherya vasulu va Pentekosite, wala kaarowa olipiherya vasulu va khula mmosa wa mitthenkeso sa Pentekosite, Vanreerela miyo kimaale. Ti yeeyo tu.

⁸² Masi eri etthu emosa paahi yo wira. Ehaana okhala etthu yooreera ni etthu yoovonyeya. Eyo ekeekhai voolikana. Khimukhanle okhalanaka yoovonyeya ni yoolikana okathi mmosaru. Nookhalana etoolare yoowothererya okhala wira epakiwe ni etoolare y’ekeekhai.

Vano, exeeni—exeeni evirikanne? Naarowa osuwela sayi nto? Ekereja Katolika enihimya wira, “Hiyo na mutthenkeso wa khalayixa.”

Pentekosite khwira, “Vano, hiyo nipacenrye ottuli wu mutthenkeso ohinatthi.”

Vaareera, ninookelela sothene *iya*.

Patista khwira, “Hiyo nipacenrye mwa Yohani. Owo aari muPatista oopacerya, hata Yesu ohinatthi orwa.”

Ahe, munookhalana inamuna sothene sa mitaphulelo. Masi nrowe nikuxe nisuwele.

⁸³ Vano, ankhi hiyo narowa eriyari ya opooma wira namphavele Yesu, wira Owo mmosaru? Naammoona mulopwana mmosa orwa owandre nlaya ntoko Owo saawanre-awe, ni ola—muupuwelo ola wa pisikoloxiia wo wira Owo aarina maihi oorakama. Hiyo khanrina hata yolempwa wa yeeyo, wira Owo aahitoko okhalana maihi oorakama. Hiyo khanisuwenle.

⁸⁴ Masi eniriwa wira hiyo noo—hiyo noomona mulopwana mmosa aakhala ntoko muratti a elatarato opintanri ya Yesu, ni

owo aahikhalana mirahu mmatatani mwawe, mirahu munawoni mw'awe, ni—ni malepa a miiwa, ni sikina, ni yaakhala ntoko, khino, elatarato ya Hofmann ya Yoowo, yaari *Muru mwa Miloko Miraru ni miraru*, wala khino ya mukina, ntoko muupuxeryo, wala—wala elatarato emosa, eyo nlelo khivaaweryaneya okhala Yesu, okhala wira kinrowa wooleelani mwaha wa xeeni: Okhala wira khaavo onrowa omoona Yesu elapo ya vathi v'erutthu ya ethayi mpakha Owo orowa toko movuwani; okhala wira ninrowa okuxiwa wira nakumane ni Yoowo osulu. Ti yeeyo.

Oh, Owo ohimnye wira mahiku ookiserya, yaamukhala aKristu oowootha, ni sothene sihimyaka wira, “Moone, Owo ori mothakoni; mpaani wiphiini; muhaamini.”

⁸⁵ Masi Owo ori va ni mukhalelo wa Erooho Yoowaarya, nto Erooho yaari mwa Kristu enimwiira itthu imosaru Owo siiraly'awe, okhala wira eyo Ekumi emosaru. Nyuwo mwahela ekumi ya mwi—mwiri wa eviteera mmwirini wa muxiri, onimwiima iwuuva. Nyuwo mwahelaru ekumi ya mwiri wa peeseku mu—mmuraleni, owo waamwiima ipeeseku. Munnona? Voolikana. Okhala wira ekumi eri memmo, enikumiherya.

Nto Ekumi eri Mukereja mwa Yesu Kristu enoovara miteko ni malepa a Yesu Kristu.

Nto Ekereja ti mutthu. Muluku onivara muteko ni Isarayeli ntoko nloko nimosa, masi Amalapo ntoko atthu v'omeekha. Vano, munniwa saana, kahi siiso? Munnona? Mutthu . . .

Nloko—nloko nimosa nnimooopowa okathi Isarayeli onirw'awe. Onrowa oyariwa ohiyu umosa okathi Isarayeli onrow'awe orwa wa Muluku emaara emosa.

Masi nto, okathi Amalapo, ti mutthu. Atthu Owo aakuminhe-awe w'Amalapo mwaha wa Nsina Nawe, ekhalaka Mwaakameliwa Awe.

⁸⁶ Vano, naarowa wira exeeni nto ohiy'ula vaakhanle wira naatthuna osuwela ekereja xeeni Owo ory'awe-mo? Kaatthunne woona sinto Owo ori mukereja Pentekosite, kaatthunne woona wira Owo ori mukereja Patista, wala ekereja Katolika (mutthenkeso wa khalayixa), wala t'uvi kaarow'aka . . .? Luteraano, eyo enrwa ohoolo wa Katolika, ni Wesley enoottarelana, erowaka siiso. Miyo kaaronwe-ru, oweha ikereja iye, kaarowa ophavela exeeni? Mutthu aarowa olattana ni Yoowo? Nnari. Pooti okhala atthu anci-ene oolattana ni Yoowo, voolikana saana. Kaarowa ophavela exeeni?

⁸⁷ Vano kaarowa omphavela mutthu orina Ekumi mwa yoowo. Miyo kaarowa ophavela Ekereja erina Erooho mwa yaawo siiso ntoko Erooho Awe. Munnona? Miyo kaarowa ophavela woona miteko Sawe. Owo ohimnye wira, “Ole onikaamini Miyo (Yohani Oowaarya 14:12), Ole onikaamini Miyo, miteko sinvar'aka nave-tho owo onoovara.” Eyo ekeekhahi? Vano hiyo . . . Owo ohimnye

wira, “Ole onikaamini Miyo, miteko sinvar’aka nave-tho owo onoovara.”

⁸⁸ Vano, nyuwo muniphwanya otaphuleliwa vo, ehimnye wira, “Suulupalexa ovikana iya onoovara, owo...” masi, vekeekhai, otaphuleliwa woolikana wa yeeyo ti... Kookhalana *Emphatic Diaglott*, nto enihimya wira, “Ole onikaamini Miyo, miteko sinvar’aka nave-tho owo onoovara, ni *soovikana* iya owo onoovara,” kahi suulupalexa, okhala wira awo khiyaawerya ovara suulupalexa. Owo ohaahihimuxa alipaookhwa, ohaavoniha aretta, oomaaliha ephattu. Khiivo etthu yaakhanle okhala yuulupalexa. Masi eyo—kahi mwa mukhalelo, masi mwa *eyaattelo* Owo aamuwerya okhala muulupalexa.

⁸⁹ Okhala wira nto Owo...Muluku aari mwa Mutthu mmosa, Kristu Yesu; mwa Yoowo waakhala oMuluku wothene woomalela mw’erutthuni. Vano, okathi Nripu nle na Mooro naakhurunw’aya oPentekositeni, mooweha, Malumi a Mooro yaakilaathi vasulu va khula mmosa a yaawo. Awo ehinatthi opacerya olavula ilavulelo, yaahikhala Malumi a Mooro. Ole aari Muluku aikawanyaka Mwaneene ni Nripu na Mooro mwa khula mempuru a Ekereja Awe. Muluku aikawanyaka Mwaneene wira Owo okhale mulaponi mothene mapuro othene emaara emosaru.

⁹⁰ Naanaano va mithukumano s’ovoniha sinimwiiraneya wAfrika. Ale oorakala animweetta, ale yahoona annoona, mulaponi mothene, Ekereja ya mulaponi mothene ya Pwiya Yesu Kristu mw’atthu voomeekha, atthu ankhala ni ammurumeela Yoowo. Muluku aahiikawanya Mwaneene khwiihela Mmansawe eriyari.

⁹¹ “Nihiku nenlo munoosuwela wira Miyo kiri mw’Atithi, ni Atithi mwa Miyo, Miyo mwa nyuwo ni nyuwo mwa Miyo.” Munnona? Munnona? “Miyo kinookhala... Okathi vakhani nto olumwenku (kosmos iwe, mukhalelo wa olumwenku), khonrowa okoona-tho Miyo. Nave nyuwo, Ekereja, munookoona, maana Miyo, *Miyo* ti ‘epronoome ya mutthu,’ Miyo kinookhala ni nyuwo, hata mwa nyuwo, mpakha omala olumwenku.” Ti yeeyo. “Miyo, Miyo kinookhala ni nyuwo...” Moone, Ekereja ya mulaponi mothene ya Pwiya Yesu Kristu. “Miyo kinookhala ni nyuwo. Miteko Miyo sinvar’aka nave-tho nyuwo munoovara.”

⁹² Vano, nrowe nuupuwele minuutu mmosa paahi vano etthu Owo iiraly’awe okathi ule. Nrowe noone enamuna xeeni ya miteko Owo aavaraawe, ni moota Owo aaisuwelinhe-awe Mwaneene. Vano, nikuxe, ntoko nlikanyiho, Owo aaihaniwa Mesiya. Ni *Mesiya* enihimya, “Ole Oottikittheliwa,” Kristu. Owo aahilaiheriwa okhuma omatta wEdeni, ottuli mwa Maphattuwelo.

⁹³ Vano, hiyo ninootthikela ottuli paahi nisuwele. Vano hiyo—hiyo noosoma ohiy’ula mwa Yohani Oowaarya 12. Nrowe nitthikele mwa Yohani Oowaarya 1, vano nto ninoosuwela etthu

Owo aary'awe. Nto hiyo naweryaru osuwela ele Owo aaryaawe, ni ekereja xeeni Owo airaawe mpannta, mutthenkeso xeeni Owo arowaawe, vano vakhala wira ti mutthenkeso ahu ninweryaahu okhala oosivelihiwa ni yeeyo.

⁹⁴ Nto ninrowa osuwela ele Owo aary'awe, ni etthu Owo aary'awe okathi ule, ni etthu Owo iiraly'awe okathi ule, Owo aahaana okhala etthu emosaru, ni wira etthu emosaru olelo, okhala wira Owo ohimnye wira aamwiira. Eyo yaamusiveliha ekereja? Ahe vano, nrowe nitthikele ottuli nisuwele.

⁹⁵ Vano, miyo kinoohimya, ni nyuwo musome. Okathi—nyuwo mwarowa owaani, mulepe ikapiitulu iya okathi onihimya'aka va. Vano nto, nakhalana . . . naarowa okhalanaka muteko w'ovoniha voohihyererya, hiyo ninoothikela paahi nimanaka okhuma Maphattuwelo mpakha Wiisuupulula wira nooniherye wira ela ekeekhahi.

⁹⁶ Vano, nyuwo pooti okhalana akhili anyu othene ookhalihwiwa (siiso yaaniira aFarisi) ya etthu Mesiya aarowaawe wira okathi Owo aarowaawe orwa. Masi Owo aarwiye voovirikana vakhani. Nnakhala vo Owo aarwiye voolikana ni ele Soolempwa saahimyaaya, enamuna Owo...awo... Soolempwa saahimye-aya wira Owo aamoowa. Vano, nrowe ninwehe Owo minuutu mmosa paahi.

⁹⁷ Hiyo ninnoona wira, nuumala oyariwa Wawe, mpakha miyaakha miloko miraru, munn'awe a mpannte waneeni, Yohani, aapatisa mothakoni. Nto Yesu aahirowa khupatisiwa, vano erimu khutthukuwa, vano owo aahoona Erooho ya Muluku ekhuruwaka ntoko epompa. Nto Owo khurowa mothakoni ni khweeriwa wa . . . mahiku miloko mixexe a xetwani, khutthika ni muteko Awe.

⁹⁸ Nto etthu yoopacerya Owo aapacenry'awe wira, hiyo ninniphwanya va mwa Yohani 1, Owo aapacenrye orwa aavonihaka atthu aretta. Vano nto aahikhala mulopwana mmosa aaihaniwa Antere aamwaaminni Yoowo. Nrowe nimukuxe yoowo okathi vakhani paahi. Nrowe nikuxe vano moota Owo aisuwelinhe-awe Mwaneene ntoko Mesiya.

⁹⁹ Vano, muupuwele wira Muluku okathi wothene onnivaha ithoonyeryo ni mitikiniho. Akavi anaamini yeeyo? Vano, mwa Waataana Wa Khalayi . . . Vano, nwiriyane oratteene. Paahi muk- . . . Khenrowa olekela. Nawerya-ru ophiyerya owoonihani Mutthaka, nyuwo . . . khonrowa okhala mutthu mpaani mu vakhaterani ya roota. Khonrowa okhala mutthu onwereiwa mpaani mu minuutu miloko mixexe okhuma vano, mwawiryanaru ni ovara oratta-ene.

Vano, nrowe nooniherye paahi. Ti yeeyo Bibilia ohimaly'awe. "Nweheke itthu sothene." Vano, vakhala wira Owo oomulapa natiri, Owo ohaana ommaliherya natiri.

100 Ni Muluku, mwa Waataana Wa Khalayi, profeta alaleerya-ru, wala namaloha aloharu yooloha, enamuna yaasuweelaaya sinto yaari ekeekhaii wala nnari, awo yaamurowela Urimi Tumimi. Mapastore n'akina annisuwela eyo, ekuwo ya vatthirima ya Aroni. Owo aahikhalana maluku muloko ni manli a maluku a eyareliwo ya axitiithi. Yaathomeiwa vanipittoni mpaani m'olompa. Nto profeta apacerya olaleerya, wala namaloha othariha yooloha, voohicala enamuna xeeni yaaiweyaaya okhala ekeekhai, yaahaaryeru veethukumanyeryoni vale va iyaaryelo mmwe, ya erimu khiyaavara muteko. Tivo awo yaanikhootta mutthaka.

101 Nkincala oreera xeeni yaaiweyaaya, moota yaalikanaaya ni teyoloxiia a Totori *lexe ni lexe*, wala moota eyo yaalikanaaya ni e. . . ekereja *ela* wala mutthenkeso *ole*, awo yaampwapwela okhala wira ya erimu khiyaavanre muteko. Amen.

102 Miyo koopacerya wona okhala natiini. Ayo, mulopwana. Weiwo Muluku oowerya sothene ory'awe, sinoorowa okhala itthu sa erimu sinkhumelela. Khimukhanle okhoottaka. Ehaana okhala siiso.

103 Vano, nwehe, vano, okathi onamukuttho ole omanlyaaya, onamukuttho wa Aroni, nto Urimi Tumimi aahikumihwiwa. Masi Muluku ookhalana Urimi Tumimi mukina, akhanle Masu Awe, Bibilia.

104 Vano, Muluku ammana natiri mBibiliani, vano nto nyuwo mwamwaakhela yoowo, natiri a erimu onookhaliha mooniheryo wa erimu, okhala wira Muluku onoolipiherya Masu Awe. Voomalela. Vaahikhale siiso, weeso kahi Masu a Muluku. Yaahikhale. . .

105 Vano—vano waamini wahu waahikhale wuulupale voophiyerya, nihimukhootte, vaari wira Muluku oomuhimya natiri, wira, “Ti siiso, masi miyo nkirina waamini oniphiyerya wira yeeyo,” mmuhiye mutthu mukina aire.

106 Kaahikhalane waamini woophiyerya opacerya weetta ntoko Enookhi siiralyaawe, weetakasa oxekuwa khurowa Owaani ni Muluku, nkinrowa nnakhala weemela mphironi mwa mutthu mukina orina waamini woophiyerya wira yeeyo. Miyo kinimwiira, “Attotopeliwe Muluku mwaha wa munn'owo, owo oheetta akhumaka elapo ya vathi, miyo kinnixukhuru mwaha wa yeeyo, miyo—miyo nkinwerya wira, masi owo. . . Miyo kinnixukhuru owo wira. Miyo. . .” Munnona? Miyo kinnaamini iyo, ni nkinthuna weemela mphironi mwa khula mutthu orina waamini wira airihe Masu a Muluku olipihiriwa. Vano, ohaana orwa okhuma wa Masu.

107 Vano, okathi Yesu oruuly'awe, Owo aarweenle Awawe, aYuta. Vano, ninniphwanya wira Owo aahikhalana ethoonyeryo ya Mesiya yaamutthara Yoowo. Yohani aahikhalela onamoona yeeyo, ni yaakhala ntoko e—epompa, Waarya, okhumaka

Wirimu. Owo aahiweha. Vano, okathi Waarya iwe, ahiiso epompa, yaakenlyaaya mwa Mwaana a mutthu, ninnoona etthu yaakhumelenle.

¹⁰⁸ Antere, nrowe nipacerye ni yoowo. Hiyo... Vano, mwa Yohani Oowaarya 1, kapiitulu 1, kiri vaavo. Ninnoona wira Antere, vamanly'awe omwaamini Pwiya Yesu Kristu, aahrowa omukuxa Simoni Petru. Nsina nawe aari Simoni okathi uwo, nto owo khumwiirela Simoni, "Vano, muhaana orwa moone." Nrowe nikele moovaanelani mwaya. Awo oowaili atothi a ihopa.

¹⁰⁹ Kinniwerya omoona Simoni, khino muulupale a oowaili aya, aahikilaathi epanthe ya ekalawa ni wira, "Antere, vano nyuwo moosuwela wira hiyo oowaili n'aFarisi, okhala wira hiyo nri toko atith'ihu a khalayi, mFarisi. Ni kinnuupuwela, Antere, atiithi ahinatthi okhwa kiryeene nlelo mwammiravo, nihiku nimosa ohoolo waya naahithotha vantthiyani nihiku nothene, nikela; ni atiith'ihu yaahivekela wira ephwanye ihopa. Nto ewoora yeeyo yookiserya naahiphwanya ihopa sa yoolya ahu mmeeloni mwaya. Oh, kinniwerya woona moota—moota amaama yaakokhorakaaya kweekwe evekelaka. Moota naamuroromelaahu Muluku wira onikhaliherye."

"Oh, vekeekhai, munna Simoni. Kinnuupuwela yeeyo orattene."

¹¹⁰ "Ahe, kinnuupuwela," (Simoni) "atithi aka yaahikileela wira nihiku nimosa evaseryaka maihi aka ottuli, ni miyo kaapweherya matata aka maihi aya oottweelela, nto awo khwira, 'Simoni, mwan'aka, miyo okathi wothene kaanitthuna kikhanle wira koone nihiku Nvuluxa ahu, Mesiya, aarowaawe orwa. Masi kinimuuluvala vano, vano kinoona wira nkinrowa owerya omoona Owo, Simoni. Masi nyuwo mwa mmiravo. Khivanihovereya wira munoomoona Owo nihiku nanyu."

¹¹¹ "Vano, onoorowa okhala otapanyeya wunci-ene. Kweekwe ti siiso, Simoni. Okathi vakhani paahi ya erimu ehinatthi wiiraneya, sinookhala itthu sinci-ene soowootha sinrowa okhumelela. Masi kintthuna wira muupuwele ela, Simoni, wira Mesiya arwa vale, Mesiya onrowa okhalana ethoonyeryo ya Mesiya. Nto nyuwo munoomusuwela Owo mwaha wa ethoonyeryo."

¹¹² "Moise ohimye siiso, maana Moise ohimye wira, e—mu, ekapiitulu ya—ya Otumererya, hiyo nimphwanya ela, wira Owo ohimye wira Apwiya..." (Otumererya 18:15, mwatthuna vale olepa wira musome. Musome ekapiitulu yothene, mukhuruwaka.) "...Apwiya Muluku anyu anoomuthanla profeta onlikana ni miyo. Enimwiiraneya wira ole ohinrowa omwiiwa profeta ola onookumihiwa eriyari y'atthu." Munnona?

¹¹³ "Vano, owo ohimye wira, 'Vano, muupuwele, Simoni, pooti okhalaka anamalavula aalupale a ikuru ankhumelela. Pooti okhalaka athu aalupale anrowa okhumelela. Masi muupuwele,

ntoko aYuta, hiyo noosuwela wira Muluku onooniveleliherya Profeta, Mesiya-Profeta. Nto mwaha . . . Vano, naahikhalana miyaakha imiya xexe vano, okhuma Malakhiya, nihirina hata maprofeta, masi Mesiya arwa vale, Owo onrowa okhala Muluku-Profeta. Hiyo ninoomusuwela Owo mwaha wa yeeyo. Vano, muhiliyale eyo, Simoni.”

114 Vano, owo onihimya wira, “Antere, nyuwo pooti ohimya wira ola mutthu muulupale. Owo onniwerya waakhaliha athu oovariwa murima. Masi wa miyo, Owo ohaana okhala Profeta okhala wira Mesiya . . .

Ni koowiiwani nyuwo olavula mwaha wa mulopwan’ole mothakoni ni sikina, Yohani. Owo, khino, aari profeta nave. Miyo nkisuwenle.

115 Masi Mesiya ola onrowa okhala Muluku-Profeta. Owo onrowa okhala Profeta-vootepe. Owo onrowa okhala oonvikana profeta. Owo onrowa okhala Profeta-vootepe. Miyo kinoorowa ni nyuwo nihiku nlo.”

116 Kinniwerya otthokelela kimoona Antere, nto, orowa okokhorela wira amwiiwe Yesu a oNasareti, vano nto khurwa owaani khimuhimeerya itthu kamosa-kamosa saakhumelenle. Vano mmeeloni mwaya khino Simoni aahilakela wira owo aamurowa.

117 Nto nyuwo muupuwele, owo aahivahiwa ihulelo, Simoni aahivahiwa, ohoolo waya. Owo aari mutthu oohisuwela etthu. Owo khaakhumle mwa hata iseminaariyu, hata ixikola saya sa Bibilia. Owo khaawerya hata olepa nsina nawe, Simoni Petru. Bibilia ohimye wira owo aari oohisuwela etthu ni oohisoma, masi awo yaahona wira owo aahikhala ni Yesu. Vano, eyo t’itthu yuulupale. Owo ti Pentekosite eekeekhai. Munnona?

118 Vano, ninniphwanya wira owo aahirowa ni khino aaronwe ni Antere, ni muttitthi muulupale w’atthu waarukurenrye. Nto naanaanoru owo ophiyakaru ohoolo wa Pwiya Yesu, aphavelaka osuwela sinto Owo aari Mesiya. Vano, ninrowa osuwela ele Mesiya aary’awe.

119 Nto owo ophiyakaru Ohoolo wa Mesiya, Owo khunweha, khwira, “Nsina nanyu ti Simoni, ni nyuwo mwa mwaana a Yona.” Oh, wulu. Eyo yaahimphiyerya. Kahi wira Owo aasuwenle paahi wira aari pani, Owo aanisuwela wira tiithi ule mutokweene ooreera murima aahimuleela etthu Owo aarow’awe okhala. Eyo yaahimaliha mwaha mahiku othene. Ole aari Mesiya. Ayo, mulopwana.

120 Vakhala wira ole aari Mesiya nsana aisuwelihaka Mmansawe w’ale Awawe, owo ti Mesiya olelo aisuwelihaka Mmansawe w’ale Awawe. Muupuwele: w’ale Awawe. Ninoorowa ophiyerya yeeyo muhina mwa minuutu mmosa.

¹²¹ Vano, yaari exeeni iyo? Yaahikhala anci-ene yeemenle vaavale, khino, yahaasuwenle saana ele. Masi Simoni aanisuwela, okhala wira owo aamphavela enamuna yeeyo ya Mutthu. Owo eettiheriwe ni Erooho. Owo aanisuwela mwaha wa Soolempwa wira ole vekeekhai aari Mesiya. Owo khaamusuwenle owo paahi, masi Owo aanaasuwela atiithi awe, ni khuwiihana oowaili masina aya.

¹²² Nto vale aahikhala mulopwana mmosa iwe aaihaniwa Filipe, nto Filipe khwira, “Eyi, ti yeeyo. Koosuwela wira ole ti Mesiya.” Nto owo khurowa orukureryaka mwaako, ikilomo miloko miili wiithela wa mwaako, wira amphwanye mpatthani wira amuhimeerye yeeyo.

¹²³ Yookhala *etthu ekina*, vekeekhai mwaakhelaru yoowoona ya Kristu, khamukhanle okhalaka oomaala. Muhaana omuleela mutthu yeeyo. Ekwannyeryo emosa paahi ya Yoowo, ennikhaliha munepa anyu woovihiwa.

“Kihaana ophwanya . . . Kookhalana mpatthani oniihaniwa Natanayeli. Owo mutthu muulupale. Owo t’osoma ooreerela.” Nto owo aahirowa muxerexere mwa mwaako.

¹²⁴ Alakela waahiphya okathi wa makaaripi okathi owo okenly’awe. Owo ommana mukhora, nto Muhano Natanayeli khurwa vamukhora. “Ahe, aahikhale mpatthani ahu Filipe.”

“Oh, ori vayi Natanayeli?”

“Owo onimweetakasa mmatta mwa miri sa mihokorokho.”

¹²⁵ Owo khurowa mmatta mwa mihokorokho, nto owo khumphwanya, vale mukhitte mwa mwiri wa efiku, owo khumphwanya Natanayeli okokhonre, khino, airaka, “O Pwiya Muluku, Nyuwo moonilaiherya ovuluxiwa. Hiyo ninwehererya yeeyo. Hiyo ninnikhala niwehereryaka yeeyo. Nyuwo munrowa wira liini, O Pwiya Muluku? Moyo kimmulipelela natiri yoole Nyuwo mummanalyaanyu.” Onoovenya, khutatha sawawe—ikuwo sawe *siiso*, vano owo khurukunuwa, nto taani eemenle vale woohikhala Filipe.

Owo khwira, vekeekhai, “Filipe, mpatthani aka.”

¹²⁶ Nto owo ohinatthi ohimya etthu, “Ehaali anyu? Miri siri saana?” owo aahikhhalana mutthaka wowaakuveya, etthu emosa y’eekeekhai. Owo khwira, “Murwe, mmoone Ole omphwanye-ahu.” Oh, olukama nipuro nene. “Murwe mmoone Ole omphwanye-ahu Yesu a oNasareti, Mwaana a Yosefe. Owo ti Mesiya. Koosuwela wira Owo ti Mesiya.”

¹²⁷ Oh, vano, kinniweya omutthokelela Natanayeli airaka, “Vano, Filipe. Vano, kinnisuwela masomi manci-ene a Bibilia naarinaahu, isomelo sinci-ene sooreera naarin’ahu vamosa. Ni hiyo ninnisuwela, nyuwo ni miyo ninnisuwela . . .

¹²⁸ “Vano, exeeni ekhumelenle, Filipe? Muroorowa woomalelani woowiixerya nipuro nlo? Ahe, exeeni yookhumelenleni, Filipe?”

Vano, muhirwe okileela wira—wira Mesiya ola vaamuweryaneya okhuma oNasareti. Vano, hiyo noosuwela, noomwiiwa Kaifa olavula wookiserya, wira nihiku nimosa Mesiya aamoorwa, ni Owo alakela aarowa okhuruwa ntoko ntteeke, moosuwela, olukame muteelani mwa empa y'okokhorela.

129 “Owo aarowa orwa mmutthenkesoni mwahu, okhala wira ti muulupalexa okhanle mulaponi. Ni Owo aarowa orwa olukama...Nto Owo aahirwe wawihu, hiyo khaninrowa waamini. Hiyo khaninrowa okhala nnaata, khaninrowa wiiwanana ni akina aya. Nnari. Ehaana...Owo onrowa orwa wa hiyo. Hiyo na yaawo. Nto Owo onimoorwa vale, vano Owo onrowa orwa wa Kaifa, mukhulupale a anamukuttho, pixipu ahu, aire, ‘Miyo ka Mesiya. Kihoorwa vano wira kixintte.’ Vekeekhai ti siiso enrow’aya wiiraneya.”

130 Muupuwelo owo khonaahiye atthu. Ti yeeyo. Masi nyuwo moosuwela? Muluku onniira itthu enamuna Owo onthun’awe wira. Owo voolimaleleya onniira voovirikana ni enamuna hiyo nilikanenlaahu wira naakhele, wira Owo owerye—Owo owerye. . .

131 Ahe, Owo—Owo oniisiipithiha maitho a ale oosuwela ni a miruku, khwiisuwelihwa wa axikhaani yaawo yaarowa wiiveyiha ni wiixuttha wa Yoowo. Vano, voowaakuva, nwehe etthu yaakhumelenle.

Masi kinniwerya omwiiwa Filipe orowa wa yoowo n’itthu yaari y’ekeekhai, kahi moolumo kamosa-kamosa Owo aahimmy’awe, masi etthu Owo aairalyaawe.

Vano, kinnimwiiwa owo wira, “Natanayeli, nyuwo mwa musomi a Soolempwa.”

“Ayo, mulopwana.”

“Muthinto xeeni wa Mutthu onrowa okhala Mesiya?”

“Vano, Mesiya onrowa okhala Profeta.”

132 “Ayo, mulopwana, eyo ekeekhai, okhala wira Moise oonihimeerya, muhooleli ahu, owo aari, wala, masu awe hiyo ninnilipanaka, ni naahaana olipana yaawo, mpakha orwa Profeta. Ni Owo aarowa okhala Mesiya, ni aarowa wooniherya ethoonyeryo ya Mesiya.”

“Ayo.”

133 “Ahe, Yesu ula a oNasareti kinlavulaaka mwaha wa yoowo...Munnimuupuwela mutothi a ihopa ole iwe awo animwiihanaaya Simoni, mwaamuthumaananne-anyu ihopa okathi ule, ni ahaawerya hata olepa epaphelo ya yeeyo?”

“Oh, ayo. Miyo kaanimusuwela, ni kaanaasuwela atithi awe saana.”

134 “Ahe, nihiku nlo munn’awe aahimuruuha mpakha vamuthukumanoni vaavo Yesu eemenly’awe. Owo

khuwehaweha, khwira, 'Nsina nanyu mwa Simoni. Nyuwo mwa mwaana a Yona. Nyuwo munnaasuwela oowanli aya.'

"Nto Owo aahiira yeeyo?"

"Ayo."

"T'ani aamuhimenrye Owo yeeyo?"

¹³⁵ "Hata mutthu. Simoni aaruhiwe ni Antere, munn'awe, khurwa vale. Nyuwo moosuwela wira khiyaarowa okitutuxa masi Owo aamooleelani nyuwo mw'ani mwaphiyaru iwe."

"Ahe, miyo nkinsuwela eyo vano. Kihaana woona. Nyuwo moosuwela, miyo ka ortotooksa okathi munci-ene. Vano, miyo kino—miyo kihaana woona yeela."

¹³⁶ Nto naanaanoru, mmeeloni mwaya okathi awo yaaruule-aya, ahe, khino awo yaahirwa muliinyani mwa mavekelo, wala khino awo yaahikela voowiryanani. Miyo nkisuwenle. Khula enamuna, Yesu omalakaruru omoona emaara yoopacerya, Yesu aahinweha, khwira, "Owo vo mwIsarayeli, mwa yoowo kuuvo wooha." Eyo yaahikumihia oturuwa mwa yoowo. Eyo . . .

¹³⁷ Owo khwira . . . Vano, khino amosa-amosa a awo yeemenle vakhiviru, khwira . . . Ahe, olelo awo yaamwiira, "Vano, vekeekhai, owo aahimusuwela wira ole aari yoowo, mwaha wa enamuna aawanre-awe, owo aari mwIsarayeli." Nnari, nnari. Othene a epantte onikhuma nsuwa anwara siiso. Vaamuweryaneya owo okhala a wArapiya. Vaamuweyaneya okhala Mukreku. Tthiri, othene ooriipa, yaawara gla- . . . yaakhalana ireru ni ikhilempa, ni malaya voolikana.

Owo—Owo khwira, "Ola va mwIsarayeli, mwa yoola kuuvo-vo wooha."

Oh, eyo yaahimukupaliha vanci-ene. Owo khwira, "Rabbi, Nyuwo mutonko okoona liini?"

Owo khwira, "Filipe ohinatthi owiihanani, okathi waaryanyu mukhitte mwa mwiri, Miyo kaahiwoonani."

Nkamwiiweni. "Rabbi, Nyuwo mwa Mwaana a Muluku; Nyuwo mwa Mwene a Isarayeli." Moone, aisuwelihaka Mmansawe w'ale Awawe.

¹³⁸ Vano, yaahikhala ale yaari vakhiviru yaaisiihana Awawe. Mmosa aya aari vakhiviru ni Yoowo, nto owo khwira, "Moosuwela? Kihaana okhalana yowaakhula wa ikereja sahu. Owo khorwiiye mmutthenkesoni mwahu. Vano ninrowa ohimyeerya exeeni ekereja wa yeeyo, okathi awo . . . ? Nihaana o—nihaana ohimya etthu, okhala wira yookhala etthu eniiriwa. Tivo hiyo . . . Ninrowa ohimyeerya exeeni ekereja ahu?"

Mmosa aya khwira, "Miyo kinimooleelani." Nikhuru naamukhaani na arumeyi vanloothoni khwira, "Ti ya xetwani. Eyo ekeekhaii."

139 Masi awo khiyaawerya onvitherya Owo. Owo aahirukunuwa, osuwelaka miyuupuwelo saya. Owo khwira, “Nyuwo munihimya eyo vookivirikanya Miyo, Mwaana a mutthu, Miyo kinimoolelevelani mwaha wa yeeyo,” masi vano, wira nithokose Masu ala, “masi nihiku nimoso, Erooho Yoowaarya enimoorwa, wira etthu emosaru. Nuulumo nimoso nooveeha yeeyo khaninkhalakhala nileveleliwaka olumwenku ula, nnakhala olumwenku onthhuna orwa.” Etampi yoochileveleleya, wihana Erooho ya Muluku envara miteko s’oMesiya, ntoko Owo saavar’awe, erooho yootakhala ntoko nahako.

140 Khwira, “Owo ti Pelizepuli, nahako. Owo onisoma miyuupuwelo saya. Owo—Owo ookhalana osoma miyuupuwelo, osoma miyuupuwelo wa mmuruni, ni Owo onniwerya osoma miyuupuwelo saya. Ti yeeyo Owo oniir’awe.” Awo khiyaawerya ohimya wira Owo khaaira, okhala wira yaari vaavale vale, ohoolo w’athu.

141 Masi nkaaweheni axilopwana ala yaatthomeliwe Ekumi. O Muluku! Nsina naya ti noohikhwa olelo. Awo ari Movuwani ni Kristu. Awo yaahisuwela wira owo ti Mesiya. Owo iirale, “Nyuwo mwa Kristu, Mwaana a Muluku mukumi, Mwene a Isarayeli.”

Owo khwira, “Okhala wira Miyo kihooleelani yeeyo, munnaamini? Vano rwaakani murowe ni Miyo. Munimoona yuulupalexa ovikana ela.” Masi okhala wira owo aanaamini!

142 Vano, vakhala wira ele yaari ethoonyeryo ya Mesiya nsana, ni Owo ti Mesiya mmosaru olelo, ehaana okhala etthu emosaru olelo ntoko saary’aya nsana. Ti siiso Owo oniisuwelahaawe Mmansawe wa Ekereja Awe.

143 Vano, ari maloko mararu paahi a atthu mulaponi. Awo t’athu a Khami, Semi, ni Yafeti; nto nihiku nle, yeeyo yaahimmwa okhala muYuta, Mmalapo, ni muSamariya. Vano, Amalapo, hiyo Anklo-Sakisoni, hiyo naari apakawu mahiku ale. Hiyo naakokhorela amuluku a ethiru, aRooma, ni sikina, ni attootto ottuli wahu; ni khinaamulipelela hata Mesiya. Nto muupuwele, Mesiya onoorwa paahi ni oniisooniherya Mmansawe w’ale animulipelela Yoowo.

144 Etthu ehinoonelaahu itthu iya olelo, hiyo khaninwehererya seiyo. Hiyo ninweha ikereja sahu, miromolelo sahu, iyiiranihelo sahu suulupale, moota oninnuwaahu. Mukumihe maitho anyu mwa yeeyo. Munwehe Mesiya. Hiyo nri okathi wookiserya.

Vano, nwehe etthu yaakhumelenle. Nto hiyo ninnoona wira Owo aahirwa. Vano, yookhala. . . Owo aapanke. . . ti siiso Owo aaisuwelin’he-awe wa aYuta.

145 Vano, ninrowa okuxa, nikhunle makukhu manli a Yohani Oowaarya, kapiitulu 4. Owo aarowa oYeriko. Akhala mutthu otonko okhala oPalestina, okhanle ohitto wa oYerusalemu. Ti weiwo Owo aarowaawe-wo. Masi Owo aanitthuna, ovira

oSamariya omwaaako. Kiireke mwaha wa xeeni? Vano, mwa Yohani Oowaarya 5:19, 5:19, munoosoma ela: “Vekeekhayi, vekeekhayi, kinooleelani wira, Mwaana khonwerya wira etthu Meekh’awe, masi ele Owo oniwoon’awe Atithi yiraka...” Moone, Owo aari Profeta, mpantte wa oProfeta wa Yoowo. Vano, Owo t’onvikana profeta. Muhuupuweleke wira miyo kinimutthuniherya Owo okhala profeta. Nkiniira.

¹⁴⁶ Koomwiiwa Munna Florence muthiyana aipaka okathi vakhani ovinre. Kinnitthuna wira owo, ohiyu umosa, nno, wira aipe, *Okhuruwa Movuwani Mwawe*. Miyo okisivela nsipo nlo. Nlo nnihimya oMuluku muulupale wa Yesu Kristu. Mahiku awo aneeryaaya omukhaliha Owo profeta paahi, Owo aari Muluku-Profeta. Owo aahinvikana profeta. Owo aari Muluku oowooniheriwa; masi ethoonyeryo Awe ya Mesiya aari profeta.

¹⁴⁷ Vano, hiyo ninnoona wira naamoonaka Owo iwe, eemenleene vale; vano khunarowa oSamariya. Vano, aSamariya yaari nuusu muYuta ni nuusu Mmalapo, yaamukokhorela Muluku. Vano, ninniphwanya wira Owo aahirowa iwe, ni yaari ewoora ntoko yanamuloko n’emosa wala muloko ni piili. Owo aarumme awiixutti Awe othuma soolya, yoolya; khurowa oSamariya. Owo aahikilaathi veehimeni, alakela ela eyoonelo, etthu ntoko elatarato ela yooreera ottuli nno, okilaanthe-ene vale veehimeni. Mwaatonko okhala oSamariya, ni oweha epooma ya anamunciene oratta-ene iwe, nlelo eri weiwe.

¹⁴⁸ Nto yaari ewoora ntoko yanamuloko n’emosa mwa nihiku. Aahikhala muthiyana mmosa aarwiiye orika maasi vakhani. Nrowe nuupuwele wira owo aari ooreera, ntoko amosamosa a axithiyana a olelo, yaari paahi yoovirikana vakhani. Vano ninniphwanya wira owo... [Muthukumano onootheya—Mol.] Ayo. Miyo kaamuupuwela yoowo, orowaka okhalana... omukhaliha owo okhalana maihi oorakama.

¹⁴⁹ Miyo kaamuupuwela muthiyan’ole aarapihale inawu sa Yesu, moosuwela, ni maithori awe khuukuttha ni maihi awe. Owo aamukhalana okathi woorika... Owo aahaana weemela ni muru awe olelo wira ophiie maihi awe vathi vale wira uukutthe inawu Sawe. Awo aamettha othene. Bibilia ohimmye wira, “Nttittimiho nawe,” tivo owo onoomettha nttittimiho nawe paahi. Miyo nkinsuwela mwaha aya. Khino owo aahinweha mutthu va owo aamuupuwelanxe-awe, oHollywood. Masi nnakhala vo...

¹⁵⁰ Nyuwo—nyuwo munookiihana namathipelela. Nyuwo munookiihana mutthu mulolo mawatthuna vale, masi Nihiku na Olamuliwa munoophwanya wira ti SIISO ANIHIMYA T’APWIYA. Ekeekhai. Khivanxankiha hiyo okhalana ekereja enkhwa; kahi enkhwa, masi yookhwa. Ti yeeyo. Erooho ya Muluku yoriipihiwa murima ni eyo yookhuma-mo. Inamuna sahu soriipihiwa murima Eyo khurowa. Ivirikanelo

sahu, ni ohicaliwa mwaha wa Yoowo, ti siirale. Nkintthuna woonanarihani. Miyo nkikhanle va wira koonanariheni. Miyo kiri va wira koovenxeni. Muluku amoriwe ikharari.

¹⁵¹ Munivahe ikuru ni ominyala wira nikhale Mmasuni a Muluku, nilaleye Awo voohicala etthu antthunaaya ohimya, etthu anihimy'aya. Hiyo ninaakuxa arumeyi wira nikhhalane musurukhu, wiisakaleliha, wira neettiherye muteko wa itelevisawu suulupale, ni itthu siiso, wiisakaleliha n'atthu. Kahi miyo. Miyo kaamwamputi wumpaathela nipwiipwi naka, n'uwurya maasi a mmurathhini, ni okhuura ipulaxa sa maakha, n'ulaleya ekeekhai, ohikhanle okhala vale ohoolo wa ekereja Nihiku na Olamuliwa, ni ohukhummwa vamosa ni yaawo.

¹⁵² Omwene aka kuhiyo wa olumwenku yoola. Mihakhu saka khasihiyo sa molumwenkuni mu. Mihakhu saka siri Wirimu, ni ocaliwa waka ti atthu a Muluku, Ekereja Awe.

Muhiilikanyihe ni mwaara a pastore khata, wala mwaara a murumeyi, wala mwaara a namalaleya. Mwiilikanyihe ni Bibilia. Ti yeeyo.

¹⁵³ Olelo hiyo nihaana wiilikanyiha. Muthiyana onoowerya owara evestiitu orowaka okereja, wala okhalana epakelo emosa ya maihi, nto khula muthiyana onthuna owara etthu emosaru. Eniireya etthu emosaru omwilimwana soomiili. Miyo nkincala sinto ekhasako aka ennilikana ni ekalsa aka wala ekravata aka ennilikana ni ekamisa aka. Kintthuna wira musuwelelo aka olikaneke ni Bibilia a Muluku. Eyo ti enamuna ya elikanelo entthunaahu olelo, muhakalaliho wa enamuna yeeyo ya elikanelo, ni Erooho ya Yesu Kristu ekhalaka eriyari ahu.

Eyo e . . . [Nipuro vahiitthu mufiitani—Mol.]

¹⁵⁴ Iyo khasikhanle otakaniheyaka vamosa ntoko awo siniiraaya nno oLos Angeles, ni wenco. Iyo khasikhanle otakanxana. Khivanweryaneya ovirikanyiha emosa ni ekina vano. Sothene sinoolikana. Mahiku ale yaari yoovirikana. Muthiyana akhala ootakhala, owo aathittiwa otakhala. Owo aakhala mooxirikhani mwawe yoowo; owo khaatakanxana n'akina aya. Vano, eri ntoko okuxa no—nooce ni orowa ni othorola eriyari aya. Enkhaliha etthu yothene ya ncano. Munnona? Vano ti yeeyo ekhanle vano.

¹⁵⁵ Nkawehani, miyo kaamusoma va vatthu prover- . . . , enipahula, kiireke, mulaponi ni oLos Angeles, moota ery'aya; oh, ti yoowoopiha. Munnuwelo anyu ori woophiyaka ipursento miloko miraru ovikana mwaisana. Exeeni . . . Vano, owo Sotoma.

¹⁵⁶ Oh, Muluku aattikinye atthu nno, moonelo, muhakalaliho nipuro nlo onrowa ottikinya ekereja ya Pentekosite otthikelatho mmooneloni mwaya, osenyelaka Mooro mmithukumanoni wira atthu esuwele saana ewoora ela enkhalaaahu, anikilaathi erupaka, ntoko, tthiri Bibilia ohimye wira awo yaamwiira, wona waka. Ahe, eyo vo.

¹⁵⁷ Vano, muthiyan'ola onookhuma. Ni owo, khino owo aakhumaka okathi yoole; khino aahikhala ota ohiyu wothene ni khurupa mpakha okathi yoole. Masi nnakhala vo, owo aakhumme ni murinki. Khuhela mikhoyi sikhaani vathi, ikwaaco sikhaani, ni khuroihela mukhoyi vathi wira orike maasi. Nto okathi vaahalelaawe osariha maasi awe, owo aahimwiiwa Mutthu wira, "Muthiyana, mukiruuhele maasi oowurya."

Vano, muupuwele owo muSamariya. Vano, Owo aahiwooniherya ethoonyeryo ela ya Mesiya aYuta. Vano, ala ti aSamariya. "Muthiyana, mukiruuhele maasi oowurya."

¹⁵⁸ Owo khwira, khuweha vale, nto owo khwira, "Vano, vano" miyo kinoowerya, owehaweha, "hiyo nookhalana ovalaana nno. Kehiyo yoolimaleleya wa Nyuwo, muryeene muYuta, okivekela miyo, muthiyana a oSamariya, etthu ntoko eyo." Nto owo khwira . . .

¹⁵⁹ Owo khino aakilaanthe vaavo, wira Owo—Owo aarina soophiyaka miyaakha miloko miraru n'itthu, masi Yoolempwa ehimnye wira, Yohani Oowaarya 6, ohimnye wira Owo aakhala wira aarina miloko mithanu. Khwira, "Nyuwo khamuhiyo mutthu a miyaakha miloko mithanu nto muniira wira moomoona Abrahamu."

¹⁶⁰ Owo khwira, "Abrahamu ohinatthi okhala, MIYO KOOKHALA." Ti yeeyo. Munnona? Alakela muteko Awe waahimukhulumula, khino iira ovekenle-ene vakhani, wala etthu.

¹⁶¹ Owo okilaanthe-ene vaavale ni muthiyana onwehaka Yoowo, Mulopwana aakhala wira orina miyaakha miloko mithanu okilaanthe ophitenrye epantte ya exiri, khwira, "Kahiyo yoolimaleleya nyuwo aYuta onivekela hiyo aSamariya."

¹⁶² Owo khwira, "Masi mwaamusuwenle Ole onlavulan'anyu, mwaamukivekela Miyo maasi." Owo iira exeenii? Vano, muhaana okuxa nuulumo naka wa yeela. Owo aaphavela othokosa erooho awe. Muluku aaroomuruma iwe. Muluku orookiruma ekereja ela. Miyo nkinoosuwelani. Munnona? Miyo nkimmusuwela hata mmosa a nyuwo.

¹⁶³ Masi Muluku aaroomuruma iwe. Owo aatthuna orowa oSamariya. Mwaha wa xeeni? Awo yaanwehererya Mesiya. Owo aahaana, orowa owooniha wira Owo aari Mesiya. Vano Owo khukilaathi vale. Muthiyan'ola khwira, khulavula ni Yoowo, khwira, ntoko elavulelo, khwira, "Ehimye ti yoowiixa, ni Nyuwo khamurina hat'etthu yo orika-no." Khwira, "Axitiith'ihu yaakokhorelaka vamwaako vaava, ni siiso, nto Nyuwo muniira oYerusalemu. . . ." Vano nvaanelo waahikelela ohoolo.

¹⁶⁴ Exeeni Owo aaphavelaawe, wira? Ophwanya vatthu vaari mulattu awe. Vano, nwiriyane oratteene vano. Ophwanya vatthu vaari mulattu awe. Vano, exeeni iyo? Mesiya onoorowa wiisuweliha Mmansawe w'ale Awawe oSamariya (Munnona?),

wa aSamariya. Moota Owo saawiirenyaawe aYuta, Owo ohaana owirela etthu emosaru aSamariya. Vekeekhai. Owo ohaana owiihana Awawe ni emosaru. . .

¹⁶⁵ Munnuupuwela ele ehimaly'aka nsana ohiyu? Vakhala wira Muluku ootoko wira ethanlelo wira etthu enamuna khata, Owo ohaana wira khula okathi enamuna emosaru. Owo aahiire, Owo aahivonya okathi airalyaawe emaara yoopacerya. Munnona? Nyuwo khamuninvaha mmosa nipattuuxa na ephaawu ya nakhuwo nto mukina nipattuuxa na mukatthe. Yothene emosaru, voolikana. Munnona? Vano, nwehe, Owo ti, Owo—Owo—Owo t'ohimala, ooloka voomalela, oowerya sothene, ookhala mapuro othene. Vano, hiyo ninnoona vo wira muSamariya ola, vano, Owo onrowa wiisuweliha sayi Mmansawe wa muSamariya? Mwaha ori eriyari ya Yoowo ni muthiyana.

Vano Owo vamanly'awe onweha minuutu vakhani, Atithi yaaroomuruma iwe, tivo Owo—Owo khwira, “Murowe, mwaaruhe aiy'anyu murwaase va.”

Owo khwira, “Miyo nkirina aiy'aka.”

“Oh,” Owo khwira, “eyo ekeekhaii. Nyuwo mwaahikhalana athanu, nto ole munkhalan'anyu vano kahiyo iy'anyu. Vano nyuwo moohimya saana.”

¹⁶⁶ Kinniwerya wona mukopwe ole wooreera, muulupale wa maihi oonyokotowa omorela mmakhatani mwawe, ni maitho awe maalupale ookhwila, nto maithori emoraka mmalakuni mwawe. Owo khwira, “Napwiya, kinoona wira Nyuwo mwa Profeta.” Moota evirikananxe aya namuttompe ole, ni alaleyi ale. Owo aanisuwelaxa sa Muluku ovikana nuusu na ale. Ti siiso saana olelo, nave. Ti yeeyo. Ayo.

¹⁶⁷ Owo khwira, “Napwiya, kinoona wira Nyuwo mwa Profeta.” Owo khwira, “Hiyo noosuwela, hiyo Mes-. . .hiyo aSamariya, noosuwela wira Mesiya arwa vale, eyo enrowa okhala ethoonyeryo Owo onrowaawe wira. Tivo Nyuwo muhaana okhala Profeta Awe. Hiyo noosuwela wira Mesiya arwa vale, Owo onoonileela itthu iya; masi Nyuwo mw'Ani?”

Oh, wulu. Khaatonko okhala masi Mmosa aawerya ohimya yeela. Owo khwira, “Miyo ka Yoowo onlavula ni nyuwo.”

Owo aahisuwela. Ole aari Mesiya owo aixuttihiw'awe wira aamorwa. Owo aahisuwela wira aarowa okhala Profeta, Muluku-Profeta. Tivo owo khwira. . .

¹⁶⁸ Owo khumoroxa muno awe, kiireke, khupweha vathi, wala etthu, vano owo khutthimaka arowaka opooma. Nto nkawehani mutthak'awe. Owo khutthimaka arowaka, khwira, “Murwe mmoone Mulopwana mmosa Yoowo okihimenrye itthu kiiraly'aka. Ela kehiyo ti ethoonyeryo ya Mesiya? Kahi yoola

Mesiya ene? Soolempwa sahu khasinnihimeerya wira Owo arwa vale, ti yeeyo Owo onrow'awe wira?"

¹⁶⁹ Ni Bibilia ohimnye wira atthu a muttethe ole yaahaamini wira Owo aari Mesiya mwaha w'onamoona wa muthiyan'ole wira Owo aahimuhimeerya itthu siiralyaawe. Eyo ti Yoolempwa? Yohani Oowaarya 4.

¹⁷⁰ Vano, kinnoona wira okathi aka onoomala, tivo kihaana waakuva vano kikhalane eliinya ya mavekelo. Nkintthuna woopisihani vanci-ene. Munnona? Masi ola, onrowa okhala muteko wookiserya w'ovoniha, ntoko sinsuwel'aka vano, mpakha Ttiminku ohiyu. Masi vano, mulipelele. Mukihiye kikuxe-tho yaamukhaani—enyutto yaamukhaani va wira kithikile epereku ila mu kikhalihе yoolipa.

¹⁷¹ Vano, vale yaari aYuta: Owo aisuwelinhe sayi Mmansawe wa aYuta ntoko Mesiya? Ooniheryaka wira Owo aari Muluku-Profeta. Eyo ekeekhai? Nyuwo othene munnikupali yeeyo? Vano, muupuwele, Awawe, Awawe. Ayuta akina, aYuta paahi, alaleyi ale a mmakhuruni, ni anamukuttho yeemenle-ene vale ni D.D.D., Ph.D., LL.D., yeemenle-ene vale, moosuwela, ni mikala saya sookhuniwa, p'uhimya wene, ewanre-ene ikhilempa, ni sothene siiso, awo khwira, "Eyo e—eyo osoma miyuupuwelo. Muhi... Munnona? Nkawehani muxovo awe. Nkawehani otthu owo okhumaly'awe-wo. Exeeni owo opacerya wene? Exikola xeeni owo okhumme-awe? Owo oixuttale vayi yeela? Hiyo khanrina hata yoohimmwa ya owo hata okhala museminaariyu sahu, tivo nyuwo moosuwela wira khivanweryaneya owo okhalana exariya. Owo khoniira mpantta wa Asempeleya. Owo khoniira mpantta wa Maunisista. Owo khoniira mpantta wa Ekereja ya Muluku, Patista, Prespiteriyaano, wala Katolika. Hiyo khanirina yoohimmwa wira owo ootoko okhala muxikola mwahu."

¹⁷² Miyo koosuwela wira kinoonyoonyiha, masi ame aka yaanikileelaka...Hiyo naari anamwane axikhaani, hiyo...nyuwo...hiyo naakhala—naakhala ohaawaxa, ottuli wu mmyaakoni, naahaana o—okuxa ephawu ya nakuwo, moosuwela, ni okuxa makhura a makukhu a enama. Naamukuxa ni ompaka fuupa. Ni khula Esaapatu ohiyu naahaana okuxa—orapa ni ephimelo ya makhura a ikhura. Wira nikhale oolikana mwaha wa Ttiminku voosiisu, otthikela oxikola. Eyo—yaari yoonanara saana, yawihu—yoolya ahu, eretta ya nikhuli ni sothene. Nampaaphi, ni ekhutte, ni ephaawu ya nakuwo, ni oravo wa meeke, kiireke ti yeeyo hiyo nilelaniwaahu. Tivo naahaana owurya makhura ale a ikhura, ni Amaama yaakhalaka...Miyo kaapacerya owurya, kaamwiira, "Oh, Maama. Xontte, xontte, khanreere okeettiha murima."

Nto awo yaamwiira, "Yaahiweettiheni murima, khanooreerelani etthu."

173 Tivo khino ela enoottikinya elyelyo anyu ya muroohoni nipuro nlo, enrowa wookhalihani saana ni weettiwa murima; enrowa owiirihia atthu waavyavya Soolempwa, okhala wira Iyo ti ekeekhai. Awo ti Masu a Muluku. Ti Seiyo sikhlanle soohivonya. Ti Seiyo simmukhalela oxaahiti Mesiya. Amen. Owo onkhala ni Masu Awe. Amen.

174 Miyo nkinihimerya “amen” mmansaka, masi *amen* enihimya “ekhale siiso.” Miyo—miyo kinnaamini ni murim’aka wothene, wira erimu n’ilapo ya vathi sinoovira, masi Masu awo khanvira.

Nwehe, muthiyana ola muSamariya. muSamariya aahaana osuwela wira Owo aari Kristu.

Vano, “Ankhi Amalapo, Munna Branham? Nyuwo munimwaahiya.”

175 Khanivo hata nipuro nimosa mwa Soolempwa vaavo Owo otonko awe opaka ethoonyeryo eyo ohoolo w’Amalapo. Mphwanye ni mukoonihe. Khekhanle mmo. Nnari, mulopwana. Khekhanle mmo. Owo aawoonihenrye ethoonyeryo Awe y’oMesiya ale yaanwehererya Mesiya. Oh, xontte nvare ela oratteene. Eyo etthu emosaru Owo oniiraawe olelo. Vano, miyo kinoowoonihani mwaha aya.

176 Vano, nwehe. Owo ohinatthi okhuma, nnya, Owo aahilaleerya mwaha wa okathi w’Amalapo. Vano, aYuta, awo yaahikhalana iyaakha ikonto xexe wira emwaamini Mesiya, ni aSamariya okhuma wu okathi wa Moise, okathi awo yaathenle-aya athiyana ala a Mowabi, ni siiso, khukawanyeya khukhala ootakaiheriwa, ni siiso. Vano, awo othene yaahikhalana sothene yaahikhalana iyaakha iya sothene enwehereryaka Mesiya, ni yaahikhala akina a *xariya* mme, vano nwehe: Awawe.

Muhimye ni miyo, “Ale Awawe.”

177 Owo aahiisuweliha Mmansawe w’ale Awawe, vano nwehe, aYuta anci-ene khayaamwaamini Owo. Okhala wira awo yaari aYuta paahi, eyo khiyaari hat’etthu, masi ale yaarina masin’aya muLiivuruni mw’Ekumi okhuma opattuxiwaka-ru olumwenku.

178 Muupuwele, Bibilia ohimnye wira othene, nwanani a Kristu mahiku ookiserya, yoowo aari mitthenkeso sa etiini. . . Kinoorowa ophiyerya yeeyo esumana yeela, Apwiya yathuna vale, wala esumana enrwa, munnona (vaareera), ni wooniherya wira owo ti nwanani a Kristu. Bibilia onihimya siiso. Ti yeeyo. “Ni owo aahiwoototha othene ale yaakhala elapo ya vathi yaawo masin’aya ahilempwe muLiivuruni mw’Ekumi ya Mwaapwittipwitthi, oiwiwe okhuma opattuxiwaka-ru olumwenku.” Owo p’ukathi oiwiwaawe. Munnona?

179 Vano, ale a, “Othene ale Atithi aki (yoovira) akivahaly’aya animoorwa wa Miyo. Ipwittipwitthi Saka sinnisuwela

Nsu Naka.” Kahi mwaha wa muthinto wala nloko, masi, “Ipwittipwitthi Saka sinnisuwela Nsu Naka.” Vano, nwehe.

¹⁸⁰ Vano, nyuwo muniira wira awo aKalvino. Miyo nkihiyo muKalvino vano. Kookupali wira elipelo enrowa ni Ekereja. Vekeekhai voolikana. Masi mwakhala Mukereja, moolipa ni yeeyo. Masi nyuwo muri Mukereja, etthu enttharelana? Vano, ti yeeyo. Kahi mwaha wo wira nyuwo mookhala, eyo khenoohelani mmo.

¹⁸¹ Vano, masi, nwehe, munna, nihiyaka mwaha owo, nitthikele wa muthiyana muSamariya. Vano, nwehe etthu Owo ohimmy’awe vo. Vano, owo khwira, “Vano, vekeekhai. Hiyo noosuwela wira ole ti Mesiya. Owo onimwiira ethoonyeryo ele Owo arwa vale.”

¹⁸² Vano, Yesu ohinatthi okhuma, muLiivuruni mwa Luka Oowaarya, Owo iirale, “Ntoko saaryaaya mahiku a oSotoma, siiso nookhala okathi w’orwa wa Mwaana a mutthu.” Mootoko wiiwa yeeyo? Vano, nrowe...Owo ohimmye toko, mwaha w’okathi wa Nowe, Owo iirale wa Nowe: elyaaka, ewuryaka, ethelanaka, ethelihanaka.

¹⁸³ Masi oSotoma, vano, nrowe niwehe. Vano, kweekwe sinkhala mixovo miraru s’atthu. Mwaawehe saana. Vano, Sotoma vekeekhai yaathoonyerya mixovo miraru sa atthu, ntoko saary’aya okathi wa Nowe, okathi olumwenku waahononiwaaya ni maasi. Vano, oSotoma waahononiwe ni mooro. Eyo ekeekhai? Vano, nwehe. Saahikhala mixovo miraru sa atthu ni aNamitthaka araru. Vano, Abrahamu aathoonyerya “Ale Awawe.”

Muhimye-tho: “Ale Awawe.”

Abrahamu nnikhuru nawe yaarisa ota wa oSotoma, ni nuulumo nene *ekereja* niihimya “oowiihaneliwa okhuma, oovalaanyiwa.”

¹⁸⁴ Lothi aahikuxa othanla wawe ni mitthenkeso sawe, khurowa ohitto iwe, aahikhala mukhulupale a mpooma. Ni amwaar’awe yiira mpantta wa muloko wothene, ni yaawara enamuna ya oHollywood, ni sikina. Munnoona etthu yaakhumelenle? Awo nlelo amphwanyaneya weiwe ntoko nripu na maakha. Vano, masi iwe awo yaatthuna okhala Hollywood. Munnona? Awo yaatthuna okhala ntoko olumwenku wothene.

¹⁸⁵ Masi Saara aari muthiyana ooreeraxa mulaponi mothene, ni owo aathanlale n’aiy’awe khukhala iwe woohaawani wa elapo, wira owerye omurumeela Muluku ni okhala mulipa-oomurithi natiri. Evirikanelo xeeni.

¹⁸⁶ Vano, okathi itthu saakhalaaya soorika, kahi suulupale, itthu sooreera, masi soorika: Nihiku nimoso Abrahamu aakilaanthe va mmuttutthini wa karvalyo, nto owo khuweha vale, khino waari ntoko othana eriyari, vano owo aahiwoona Alopwana

araru erwaasaka, ntthupi mukuwoni Mwaya mothene. Vano, nvarele Soolempwa iyo piili, vano. Vano, owo aahiwoona Awo, ntthupi mukuwoni Mwaya mothene. Vano Awo khurwa. Nto Abrahamu, aryeene a erooho ni alipelelaka omoona natiri uwo, naanaanoru (Owo aari “oowiihaneliwa okhuma.”) owo aahisuwela. Yaahikhala etthu yootikiniha wa Atthu ale.

Oh, vekeekhai siiso Awo yaahimye wira, “Ehaali anyu, mulopwana? Hiyo n’Amalapo. Hiyo nikhumme ilapo s’okhopela.”

¹⁸⁷ Owo khurwa okumana n’awo, khwira, “Murwe mukilaathi mukhitte mwa mwiri. Kaatthuna kilavule ni Nyuwo minuutu mmosa paahi. Mukihiye kirowele maasi vakhani murapihe inawu Sanyu, ni koovaheni nipattuuxa na mukatthe. Nto muruweke ephiro anyu. Khukilaathi. Mwaha wa yeeyo Nyuwo muruuly’anyu ephiro ela. Muluku oorummeni ephiro ela wira miyo kiwerye—miyo kiwerye owiirelani yeela Nyuwo.”

“Ahe,” Awo khwira, “rowakani, ekhale siiso,” vano khurwa, khukilaathi.

¹⁸⁸ Kinniwerya omoona ovolowa, wira, “Saara,” ottuli wu muheemani, khwira, “mukhatte otthu vakhani. Mukuxe ethokwa, nveere otthu vakhani va, wala etthu, mpake mikatthe vaikho.” Nto khukhuma khumphwanya mwaanyompe ooneneva, khumwiiva, khunvaha murumeyi, khwira, “Mmureerihe.”

Nto owo aahitthokiha yothene, khimuruuha ohooolo Wawe, khukilaathi. Vano, nwehe.

¹⁸⁹ Ntoko saary’aya oSotoma, enrowa okhala siisa, okhala wira ola okathi woopaha. Munnaamini yeeyo? Vanreerela mwaamini, okathi itroxeeniyu, ni ikapwitthi sa atomu, ni asputnik, ni sothene sikina sinvavaaya soorukureryakani, vanreerela mukhale mwaaminiki, okhala wira enimoorwa.

¹⁹⁰ Nwehe. Vano, exeeni yaakhumelenle? Ela t’ile yaakhumelenle. Malaikha yaakilaanthe vale vakhani, araru Aya. Awo yaakhala eweahasaka oSotoma. Vaviraly’aya okathi. . . Vano, muupuwele, anli aya yaarowanse oSotoma. Akavi ansuwela yeeyo? Anli aya yaarowanse oSotoma, ni yaahilaleya. Oh, e—Billy Graham a vano, moone, aaronwe oSotoma, okhala wira yaahikhala. . . Lothi aari weiwo, yoowo aathonyerya mulipa—oowaamini ookuttihiwa, mulipa—oowaamini a mmukaanoni, munna a mmuromoleloni. Owo aari wu oSotoma ni olumwenku wothene. Muthukumano awe waari wothene wa molumwenkuni ni itthu sothene sikina. Masi owo aari weiwo.

¹⁹¹ Nto awo yaahimuruma Billy Graham a vano orowa waalaleerya, nnakhala miiriirya, aakhalinhe ohoona paahi; ni olaleya Ehapari yooreera ennimukhaliha ole oohaamini ohoona. Hiyo noosuwela eyo. Kahi—kahi—kahi Lothi aakhalihiwe

oohoona, masi, aakhalihwiwe oochoona, kiireke, masi akina ti yaakhalihwiwe oochoona.

¹⁹² Vano. Masi vano, hiyo ninnoona muthinto xeeni wa ethoonyeryo awo yiiraly'aya: yaalaleiye Ehapari yooreera mwa enamuna emosa yaamukhalinhe-aya oochoona mulipa-oochaamani eekeekhahi khumwiihanela Lothi ota mooro ohinatthi omora. Eyo eekeekhahi?

¹⁹³ Nkanweheni Mutthu ula, aahanle ottuli, ethoonyeryo Owo aavahaly'awe ekereja, "Ale Awawe." Ole aahanle ottuli khinaari Nlaikha. Aari Muluku. Bibilia ohimye wira aari Muluku. Abrahamu aamwiihannne "Elohim," Ole onkhala mmansawe, ileetera suulupale P-w-i-y-a. Owo aahaana osuwela. Owo aari ole aalavula ni Yoowo. Muluku. . .

Murumeyi mmosa aahikiirela emaara emosa—okathi, owo iirale—iirale, "Munihimya wira ole aari Yehova Muluku?"

Miyo khwira, "Ole aari Yehova Muluku. Oh," miyo khwira, "nyuwo munoovonya paahi osuwela moota Owo ory'awe muulupalexa."

¹⁹⁴ Hiyo nipakaniwe exeeni? Itthu muloko ni thanu na mosa: ekhinampo, epotaasiyu, pataroota, waarya wa olumwenku. Owo aarina nikuphi nimosa paahi khwira "Whish! Rwani nno, Kapiriyeli, mukele-mo." Munnona? "Whish!" Khwiiseela nimosa va na Nlaikha nikina. "Wish!" Khwiiseela emosa ya Yoowo. Khukhuruwa, khukhuura enama ya mwaanyompe, khiwurya eleethi ya enyompe, khukhuura ephaawu ya nakhuwo, khulakaseya naananoru ohoolo wa Abrahamu. Munnona?

¹⁹⁵ Ahe, owo ti Muluku onnikhalana hiyo. Miyo pooti ohikhala hata ekhwiyeri y'ettuurwa, wala nnakhala nyuwo, masi Owo onniwerya olavula (Aleluya!), miyo kinookhuma. Owo onookiihana. Kinnitteeliwa murima Owo okisuwela, ni kinnitteeliwa murima miyo omusuwela Owo. Owo ti Yehova. Owo aari vo. Owo aathoonyerya exeeni? Ele Owo aarowaawe okhala mahiku ookiserya, akhalaka mw'erutthuni.

¹⁹⁶ Vano, nwehe oratteene. Vano, ninnoona wira eyo e... Nrowe noone enamuna xeeni ya ethoonyeryo Owo onaavahaawe Awawe. Etthu emosaru ntoko Owo siiralyaawe okathi waaruuly'awe elapo ya vathi, Muluku aipanke erutthu mwa Kristu. Vano, nwehe, Owo aarina ettuli Awe orukununwe. Nto Owo khwira, "Abrahamu (Owo aasuwenle sayi wira ole aari Abrahamu?), ari vayi amwaar'inyu, Saara?" Exeeni? Aanisuwela wira nsina nawe aari Abrahamu, aanisuwela wira aahithela, ni aahikhalana mwaara, ni nsina nawe aari Saara.

Abrahamu aahitikinihiwa, khwira, ni Bibilia voothoonyerya onihimya wira Abrahamu iirale wira, "Awo ari muheemani ottuli Wanyu."

¹⁹⁷ Athiyana okathi ule khayiiraka ntoko awo siniiraaya vano: okhumela vate, ni okhalana, okuxa nipuro na aiy'aya, ni omwiira nakoso othene, ni othanla muhina mwa ipoliitika, ni waahela athu aya ntoko simanlyaaya wira, ni itthu siiso. Nnari. Awo khayiiraka okathi ule. Nnari. Awo yaanisuwelaxa sa Muluku. Saara aamwiihanaka Abrahamu “pwiya'awe.”

Vano, khwira, “Awo ari muheemani ottuli Wanyu.” Muheemani ottuli Wanyu.

¹⁹⁸ Owo khwira, “Abrahamu (Nwiriyaane!), Miyo (Oh, ikharari! *Miyo*, epronooome ya mutthu-tho), Miyo kinoorowa woothotolani vootthariha okathi w'ekumi, ntoko soohimenryaakani natiri ule wopaceryani, miyaakha miloko miili ni mithanu sivinre.”

¹⁹⁹ Va aari Mutthu okhuuraka mukatthe wa nakhuwo, okhuuraka enama ya mwaanyompe, ni owuryaka eleethi ya enyompe, ni manteeka mmukattheni, khivanihovereya, okilaanthe-ene vale okhuuraka yeeyo, ni airaka, “Miyo kihoomanelani natiri, nto kinoorowa wira.” Amen.

Nto Abrahamu aamwiihanne “Elohim,” Muluku Oowerya sothene. Vale, yaari, okilaanthe-ene vale, khwira, “Miyo kinrowa woothotolani vootthariha. . .”

²⁰⁰ Nto Saara, ottuli muheemani, khurora, khutheya, khwira, “Miyo, muthiyana oowuuluvala va, a miyaakha emiya, ni okhalana opuha n'apwiya aka siiso? Oh, khivaaweryaneya okhala.”

²⁰¹ Nto mu—Mulopwan'owo okilaanthe-ene vale khwira, “Saara otheyenleni?” Oh, enamuna xeeni ya osoma miyuupuwelo ele? Muthinto xeeni wa. . .? Muthiyana muheemani ottuli Wawe. Khwira, “Owo otheyenleni?”

²⁰² Vano, nwehe. Yesu ohimye wira, “Ntoko saary'aya mahiku a oSotoma, siiso onookhala orwa wa Mwaana a mutthu,” wira Muluku aamwiisoniherya Mmansawe mw'erutthuni ya mutthu, Ekereja Awe, Erutthu ya Kristu, ni aamwiira ethoonyeryo emosaru. Iwe Amalapo anoophwanya.

²⁰³ Vano. “Mwaatthu, naaphavela omoona Yesu.” Owo mmosaru nsana, olelo, ni mahiku othene? Munnoona moota Owo aisuwelinh'awe Mmansawe wa aYuta? moota Owo aisuwelinh'awe Mmansawe w'Amalapo? ni, ahiiso, aSamariya? ni aahaalaiherya Amalapo.

²⁰⁴ Vano, naahikhalana miyaakha ikonto piili, khenatoko okhala mukereja. Masi onookhala Waarya okathi wa makaaripi. Profeta ohimye wira, “Ninookhala nihiku nimoso nihinrowa wihaniwa ohiyu nnakhala othana, masi makaaripi onookhala Waarya.”

Vano, nwiriyaane. Mukihiye. . . Nihiku nimoso esumana yeela, Apwiya yatthuna vale, kintthuna kilaleye *Onkhuma nsuwa Ni Onkela nsuwa Wakumanaru.*

205 Vano, khula mutthu orina esomelo onnisuwela wira osilimu wentte ni nsuwa, opacerya onkhuma nsuwa mpakha onkela nsuwa. Akavi ansuwela yeeyo? Vekeekhai munnisuwela. Osilimu, wa khalayixa orinaahu ti Xiina, nto khuvira weettaka. Osilimu wentte ni nsuwa.

206 Vano, mw'atthu a epantte onikhuma nsuwa . . . Weephakani wa onikhuma nsuwa n-s-u-w-a ninookhuma ni nintupweela, w'atthu onkela nsuwa: n-s-u-w-a. Ni M-w-a-a-n-a a Muluku, siiso ntoko n-s-u-w-a na Muluku, M-w-a-a-n-a a Muluku [Moolumo a mw'Enkelesi "Mwaana" ni "nsuwa" aniiweya volikana masi anlempwa voovirikana—Mot.] aarwiiye w'atthu a onikhuma nsuwa, aYuta, nto siiso . . . Eyo ekeekhai? Akereku ni akina, khurwa onkhuma nsuwa.

207 Vano, sookhala miyaakha ikonto piili sinkhalaka sooriipela. Awo aapaka mitthenkeso, ni aateka ixipiritaali, ni awo aateka ikereja, yiirale paahi itthu Yesu ohaahimenryaawe wira yiire. Owo khonahimyeke wira muteke ikereja. Owo khonahimyeke wira muteke mitthenkeso. Oirale, "Mulaleye Ehapari yooreera (Ti yeeyo.), mooniherye owerya wa Muluku."

208 Masi itthu iya sookuxa opuro aya. Iyo sookhala nihiku naya. Masi vano, "Okathi wa makaaripi," Owo ohimnye wira, "onookhala Waarya." Nto Mwaana mmosaru aanrye onkhuma nsuwa onaarya onkela nsuwa. Ithoonyeryo imosaru sa Mesiya saairiwe iwe wira ooniherye wira aari Mesiya, sinaarya onkela nsuwa. Nto hiyo nri Olimani Onkela nsuwa. Hiyo nri imeeturu imiya xexe ni miloko mithanu ni thanu na piili, ninhalela, wa ephareya. Nto narowaru epantte ele, ninrowa vayi? Nintthikela-tho oXiina. Onkhuma nsuwa ni onkela nsuwa sookumana.

209 Mwaha wa yeeyo etampi enthukumanaaya nno Olimani Onkela nsuwa nno. Yowooapiha, ni ti yootakhala. Vano, hiyo naaniveleelihaka oFransa wira nakuxe itharihelo. Fransa onniveleeliherya hiyo wira ophwanye mihapo sa athiyana.

210 Athiyana ahu aPentekosite, wuuliha muru. Nyuwo alopwana aPentekosite, mwaavuraka asikaro ni wira soonanara, ni waathela athiyana araru wala axexe, nave matiyaakono mukereja. Wuuliha muru. Muluku omorele ikharari munep'anyu w'etampi. Ni nyuwo mitthenkeso sa—sa Metotista, ni Patista, ni Asempeleya a Muluku, ni Ikereja sa Muluku muntthuniherya yeeyo . . .

211 Nyuwo muniira, "Nyuwo kweekwe munaakuxa athiyana." Khula mulopwana onrowa waahiya amwaar'awe waawara akaputtula ni waavura asikaro, eyo enooniherya etthu epakaniwaawe. Owo kahiyu mulopwana.

"Oh," nyuwo muniira, "nyuwo mu—nyuwo mwa oolipa murima, Munna Branham."

212 Nkihiyo. Miyo nkihiyo oolipa murima. Miyo kinlaleya Masu a Muluku. Eyo ekeekhai volikana. Wuuliha muru. Mwiitathe

mwiitthikele mmansinyu. Mutthikele wa Muluku. “Onookhala Waarya okathi wa makaaripi.” Mwaatthu, naaphavela omoona Yesu.

²¹³ Owo aahittikiha moolumo? Ookhala profeta otonko ottikiha moolumo? Owo aahilipiherya onamoona Awe ni Ephome Awe. Alopwana a Muluku eekeekhai khanttikiha moolumo mwaha wa epokrama ya mutelevisawuni nipuro nlo, wala ophwanya musurukhu, wala mutthokiheryo muulupale w’osoma. Owo onoohimya ekeekhai. Vakhala wira entthuneya ekumi, owo onoohimya ekeekhai. Ti yeeyo.

²¹⁴ Awo pooti woonyokhani nihiku nimosa, masi nihiku nikina nirwaaka okathi awo anrowaaya woophentani, okhala wira nyuwo munihimya ekeekhaii. Masu a Muluku anihimya wira ekeekhaii. Khiivo hata Yoolempwa mBibiliani wa mwiirelo wa ekereja Pentekosite olelo, nnakhala vakhani, ti yoovirikana n’iyo, nnakhala nyuwo Patista ni Metotista.

²¹⁵ Whish! Miyo koosuwela wira eyo ti yoolipa, masi ti yeeyo kintthun’aka wira ekhale, wira nyuwo mookolele. Nto nihiku nimosa munookumana iwe Opwaro wo Olamuliwa. Munna, awo Masu a Muluku. Mapastore anyu ni sikina, arookhala oolosowa ovikana maasi oorapiheliwa mihasa. Eyo, ekereja ettikitti ya yoolya ohiya epulpitu. Ti yeeyo.

²¹⁶ Hiyo ninaatthuna alopwana a Muluku anrowa weemela ni ohimya ekeekhai, voochicala taani enaanariha. Vakhala wira antthuneya matiyaakono, maatimministratore, ni itthu sothene sikina, mukhale naxariya.

²¹⁷ Mmweemererye Muluku, ni mwaamini Masu Awe, nto Muluku onoolipiherya Masu Awo. Awo yaahiluluwanya exeko emaara emosa; enooluluwanya emaara ekina. Masi nyuwo muhaana oluluwanya ni yeeyo. Nyuwo khamukhanle oninihaka mulithi wa kapwitthi epantti *ela* n’uwehererya omana epantte *ele*. Khamunrowa wira. Muninihe moonoo woothiyana ni woolopwana. Khamunrowa wira. Onimooopela eliinya yooookowa. Nihaana okela mwa Yoolempwa *ela* ni woolopela Yeeyo voookowa. Amen.

“Mwaatthu, naaphavela omoona Yesu.” Bibilia ohimye wira, “Owo mmosaru nsana, olelo, mahiku othene.”

Munivahe minuutu muloko ni mithanu, munnitthuna? Erooho Yoowaarya mukereja mu.

²¹⁸ Vano, vakhala wira koonanariha, muki-...Nnari, muhikilevelele. Huh-uh. Muhiire. Rowakani owaani paahi, muupuwele yeeyo okathi vakhani. Miyo nki...nkinthuna... Kihaana ohimya itthu imaara sikina sinthikila ntoko miyaalo ni...Masi—masi, munna, miyo—miyo kinnithokorerya. Miyo kinnithokorerya ohoolo wa Muluku ohimya ekeekhai. Vano vakhala wira miyo kihimye ekeekhai, Muluku onoolipiherya wira eyo ekeekhaii. Vano, nrowe noone vakhala wira kihimye

ekeekhahi wala nnari. Nrowe naavekele Atithi erwe va yookhumela. Nrowe ninvekele Muluku orwe, ni olipiherye etthu . . . vakhala wira eyo ekeekhahi. Yaahikhale ekeekhai, Owo khonrowa olipiherya. Yakhala ekeekhai, Owo onoolipiherya.

219 Ni nyuwo atthu mwaatthuna omoona Yoowo, Owo arwaaru khwiira etthu emosaru ohiyu ula mukereja mu . . . Khivancala moota xeeni Owo onikittikitthelaawe, Owo ohaana woottikitthelani nave. Yesu aahirowa elapo Awe, ni miteko sinci-ene sa ikuru Owo khaawenrye ovara mwaha wo ohaamini waya. Masi okathi omphwannye-awe mutthu omwaaminiki, muthiyana aakhwannye mukerekhere mwa nlaya Nawe khuvonihiwa oratta-ene. Ayo. Mwaamutthuna omoona Yesu?

220 Vano, vakhala wira . . . Khivancala moota xeeni Owo aarow'awe owara, moota aarowaawe okhala, vakhalaru wira Ekumi ila eri mwa Yoowo, mwa mutthu wala atthu, eyo enimwiira itthu imosaru Owo oiralyaawe, okhala wira Owo oolaiherya. Eyo ti ethoonyeryo ya Mesiya vano wa mahiku ookiserya? Akavi ansuwela saana? Nvenxe ntata, mwiire, "Kinnisuwela saana. Miyo kinnaamini." Nivekele.

221 Tithi oomoriwa ikharari, oh, xeeni erinaaka ohimya itthu iyo siiso? Miyo—miyo . . . Atthu anaalyiha an'aka, a—atthu anihela ikuwo ottuli waka, ni anliva mikwaha saka mulaponi, nave nnakhala vo, Muluku, mwaahiye esuwele saana wira miyo—miyo kimpavela waatatha paahi, Pwiya. Miyo—miyo kimpavela oruha ekereja otthikela-tho ephiro ya khalayi. Mwaatthuniherye esuwele saana. Erooho Yoowaarya yaasuwelihe wira khuhiyo olipa murima; khuhiyo ohi- . . . okhala oohicaliwa; masi eri wira kikhale ooromeleya, Pwiya, ni ohimya ekeekhai voohicala.

222 Vano, Tithi, Nyuwo munoolipiherya ekeekhai Anyu wa hiyo ohiy'ula? Miyo kihaavaha nuulumo na ikuru wira Nyuwo mwa mmosaru nsana, olelo, ni mahiku othene. Muhiye Erooho Yoowaarya erwe ohiy'ula, Tithi, ni ettikitthele nikhuru nla naamukhaani n'atthu va.

223 Ni mwaahiye esuwele wira atthu ala . . . Miyo kinihimya itthu iya, masi enookaravariwa va. Efiita ela enoorowa mulaponi mothene. Enootaphuleliwa mwa manci-ene, mattaava manci-ene oovirikana mulaponi, ni atthu a mapuro othene anrowa wiiwaka yeeyo. Ni kihaana ophima moolumo aka, Pwiya, wira awo t'ekeekhai; ni Masu Anyu, nave kahi awaka.

224 Miyo kinoohimyani Nyuwo paahi, kilapaka, ntoko Bibilia sinihimya'awe, wira Nyuwo vano mwa Namukuttho Muulupale a ohimya wahu. Miyo kinihimya Masu Anyu wira Nyuwo mwa mmosaru nsana, olelo, ni mahiku othene. Mulavule, Pwiya Muluku, ni mwaatthuniherye atthu esuwele wira—wira Nyuwo ti nvanhe Mutthaka, kahi murumeyi Anyu. Munivahe, Pwiya.

225 Hiyo ninnivahererya sothene wa Nyuwo vano. Miyo nkaawerya ohimya-tho. Nto Nuulumo nimos a ninkhuma wa Nyuwo ninookhala onvikana khula mulaleyi vaakhanly'awe olaleyaka muhina mwa miyaakha imilyawu, Nuulumo nimos a paahi. Hiyo noosuwela wira Eyo eri vo, noosuwela wira Eyo ekeekhahi.

226 Nto vano ninthuna wira Nyuwo mulipiherye Masu ni ithoonyeryo sithharaka, ntoko Nyuwo sihimaly'anyu, wira awo esuwele wira kaahimenrye ekeekhahi, wira Nyuwo mwa Mesiya. Nripu nla nuulupale na Mooro awo arin'aya elatarato aya, va, ni wAlemaanya, oSuwiisa, okhuma elapo yothene, vaavo awo akumihalyaaya, wira nlo Nripu na Mooro nenlo naaronwe n'ana a Isarayeli.

227 Okathi Owo orwiyaawe va elapo ya vathi, hiyo ninniphwanya wira Nripu na Mooro nle naakhala mw'erutthuni, Mwaana a Muluku. Hiyo nooweha miteko Owo sivanryaawe. Owo iirale, "Miyo kikhumme wa Muluku, ni kintthikela wa Muluku." Ohoolo waya, numala okhwa Wawe, ovithiwa, ni ohihimuwa Owo aahitthikela w'Atithi.

228 Nto nihiku nimos a Saulo a oTarsu orowaka oTamasiku wira aathukele atthu, nto Nripu nimosaru nenle na Mooro naahimmoroxela vathi, Waarya waapwenxe maitho awe, waahimukhaliha ohoona mwa okathi.

Nto Owo khwira, "Saulo, Saulo, munikilupatthela-ni?"

Owo khaasuwela etthu naari Nripu nle na Mooro. Owo khwira, "Nyuwo mw'Ani?"

"Ti yoolipa wa nyuwo ovirikanya masoso."

"Nyuwo mw'ani, Pwiya?"

Owo khwira, "Miyo ka Yesu."

229 Vano, Pwiya, olumwenku wa siyensiya onnisuwela, vamanly'aya okumiha elatarato, wira nlo Nripu na Mooro nenlo. Waari Waarya wootikiniha owo kahi paahi woothamaliha, masi nlo noolukammwa mulentini mwa maakina a ilatarato.

230 Vano, yakhala Erooho emosaru, nto Eyo enoovara muteko mmosaru atthu yaikhaliharu mukhalelo mmosaru. Muhiye okhale ohiy'ula, Pwiya, wira miyo ni ekereja ela, ni axinna ala, Nyuwo mwiisooniherye Mmansinyu wira mwa Yesu Kristu mmosaru nsana, olelo, ni mahiku othene.

231 Nakhuma vale ohiy'ula, ntoko ale a Emawusi, ninthuna niwooneni Nyuwo wira vano, itthu Nyuwo siiraly'anyu ohinatthi okhomeliwa Wanyu, ni anatiri Anyu wira Nyuwo mwaamwiira, nto siviralyaaya miyaakha ikonto piili, Nyuwo mwiisooniherye Mmansinyu ohiy'ula, nto hiyo narowa owaani, nnimwiira, "Khinoona murim'ahu oniviha mwa hiyo, okathi Owo aaisuwelihaawe Mmansawe eriyari ahu ohiy'ula?"

²³² Nto Pwiya, miyo kookupali wira enoowiiriha athtu otthika wira evekele ni otthuka—ni ekerej'ela yaamukhaani enimunnuwa, ni owerya wa Muluku onookhala mwa yeeyo, ni olaleerya s'eprofeta ni ithoonyeryo suulupale ni mitikiniho, ni athiyana ni alopwana oowookololiwa ni weetta ohoolo wa Muluku voowiyeviha murima. Nto, oh, omoova xeeni Muluku onrowa orwa mulaponi, Pwiya. Mwaavahe ithoonyeryo suulupale ni mitikiniho. Munivahe. Mulipihe Ekereja Anyu, Pwiya.

²³³ O Muluku, nwiiane athtu Anyu; mwaakumihe mw'evitikavitika ela mahiku ookiserya. Munivahe. Hiyo nmimowehereryani Nyuwo, Tithi, wira mulavule ni hiyo muliinyani mwa mavekelo, okathi oniihanaahu, mwa Nsina na Pwiya Yesu Kristu. Amen.

Vano, nyuwo mwavilelaru ni hiyo vakhani paahi. . . [Nipuro vahiitthu mufiitani—Mol.]

²³⁴ Liini mutonko anyu woona evonyeiye? Khenivonyeya, okhala wira ti Muluku. Khivanweryaneya ovonyeya. Muluku ooveleeliha eyo. Ni ti y'ekeekhaixa wa miyo ntoko sinkhalaaya wa nyuwo owurya maasi. Munnona? Miyo kiri oororomela saana wira Muluku onimweettetta vanlakani ntoko seemenlyaaka vaplataforma va ohiy'ula, okhala wira owo natiri Awe.

²³⁵ Nto Owo aira siiso, nto eyo enimooniherya wira Owo ti Mesiya mmosaru yoole ontthikela. Vano, w'ani? Kahi w'ale a ota, mitthenkeso suulupale ni itthu, masi wa ale Oothanliwa (Munnona?), Ekereja. Munnoona enihimy'aka? Ale Awawe.

Nyuwo muniira, “Muhinkhalanela-ni eprokrama yuulupale ya etelevisawu?”

Owo aaveleelihenrye Awawe, Oothanliwa, ale yihaneliwe okhuma, kahi ale a maluwa.

²³⁶ Yesu khaarina etthekulelo. Owo khaari mutthu a etthekulelo. Owo—Owo. . . Awo yiirale, “Muhinkhumela-ni nikhuru nle iwe omuro? Nyuwo muneetta paahi nnikhuru noolikana na masantu oophirikeya,” nyuwo moosuwela. “Murwe nno mmoonihе Kaifa etthu munweryaanyu wira.” Owo khonatoko wira. Uh-huh. Owo aari, aakhala vowiyeviha, voomaaleleya.

²³⁷ Owo aarwenle Awawe, wira. . . Owo aaisuwelinhe Awawe, ohoolo w'aYuta, ale yaamukhontte Yoowo, awo yaahikelela wa Ehimalelo. Ale amwaakhenle Yoowo ni yaaminni, nsina naya ti noohikhwa, ni ninookhala mahiku othene. Ti yeeyo.

²³⁸ Vano, miyo nkhiyo Yoowo. Miyo ka munn'inyu paahi. Miyo ka munn'inyu, murumeyi a Yesu Kristu, kiveleelihiwe va n'axinn'aka, ni nyuwo athtu va, wira. . . ni yoovaha enooniherya. Nto kaakhalanne okathi, kaamuwerya okuxa ovira mBibiliani esumana ela, ni owooniheryani ni Soolempwa ni Soolempwa,

iyooniheryo soohivonyeya wira ola okathi aya. Muhihiye eyo woovirani. Munnona?

²³⁹ Va ookhala mwaaruusi mmosa. Miyo nkinatoko omoona kookhalaru, mwaaruusi mmosa oophenteya. Owo siiso okhanlene muKristu; siiso ohikhanle. Siiso owo okhanle—siiso owo owereiwaka; pooti ohiwereiwaka. Owo pooti orine-ene mikattyamiho sa musurukhu, mikattyamiho sa vatthokoni. Miyo nkinatoko omoona kookhalaru. Masi va oniphwanyaneya moonelo woolikana wa etthu kaahimy'aka.

²⁴⁰ Va eri eyoonelo yaamukhaani ohiy'ula. Va ori mulopwana mmosa ni va ori muthiyana mmosa, ankumana emaara aya yoopacerya. Owo onoovenxaru ntata, owo khaakisuwela, ni va ari matat'aka nkinimusuwela, nkinamooneke kookhalaru. Munnona? Nto owo ohimye wira miyo ka mmalapo wa nyuwo. Eyo ekeekhai, muhano? Hiyo nri va.

²⁴¹ Vano, “Mwaatthu, naaphavela omoona Yesu.” Owo aarowa wira exeeni Owo aakhumelenle-ru? Ntoko Owo siiralyaawe nihiku nle veehimeni, muthiyana muSamariya. Eyo ekeekhai?

²⁴² Vano, exeeni Owo okhanly'awe wiiraka? Okittikitthela miyo ni omuttikitthela owo. Owo aahiire, nkikhanle ohimyaka etthu emosa. Ela ti yoohiwa ni yoohilavula mpakha etthu olavulamo. [Munna Branham omanne vamiikorofooni—Mol.] Siiso miyo kiryaaka. Miyo nkimmusuwela. Owo khonkisuwela. Vano moota—kinrowa osuwela sayi etthu ya yoola?

Vano, ankhi miyo kaahimye wira, “Muhano, munoowereiwa?”

Owo aamwiira, “Ayo, mulopwana, Mwenye Branham, kinoowereiwa.”

²⁴³ “Avuwihawe Muluku! Aleluya!” Kinoomuttikinya, aire, “Avuwihawe Muluku! Mwaakhele. Aleluya! Muroweke. Moovonihiwa.” Eyo yaamuweryaneya okhala saana. Vekeekhai, eyo yaamukhala yooreera. Owo aamwaamini, aamukhala mukumi. Vekeekhai.

²⁴⁴ Siiso ntoko Charlie Fuller saahimalyaawe va emaara emosa, Munna Fuller, owo khwira, “Miyo kinnaamini soovaha iya, ni kinnaamini soovaha iya suulupale sa ovoniha nave, masi,” khwira, “iyo soovaha sa ovoniha, masi Muluku onoowaakhuliha axilopwana ale Opwaro wo Olamuliwa mwaha wo weettelaka nakoso.” Ni miyo kinaamini siiso nave. Owo ookhalana exariya, vo. Ayo, mulopwana. Muhimweetteleke nakoso Muluku. Owo khokhanle weeteliwaka nakoso. Masi Muluku onimoolivihani mwaha w'etthu eniir'anyu, enamuna enrumeelaanyu muteko.

²⁴⁵ Vano, muhano, miyo ka mmalapo. Mutthu mmosa, owo ookhalana ettikitti ya mavekelo mmatatani mwawe, mutthu aahaana ophwanya. Murwe va, Oophentiwa. [Munna muthiyana onlavula ni Munna Branham—Mol.] Oh, ti—oh, ti— kehiyo,

kinnoona, eyo emosa, etthu ekina vale. Koono wira yaari ettikitti ya mavekelo. Kileveleliwe. Oh, owo ti. . . eyo ti ya. . . owo orina ettikitti ya mutthu mukina. Vaareera.

²⁴⁶ Vano, vakhala wira Yesu Kristu mmosaru nsana, olelo, ni mahiku othene. . . Vano, miyo kiniwooniheryani Bibilia, ekereja Pentekosite, kinihimya *ela, va*, Miyo kiniwooniheryani Bibilia ni etthu Yesu aary'awe nsana. Vano, Owo ohimnye wira nihiku nla nookiserya Owo aamukhuruwa mw'erutthu ya mutthu, ntoko Owo siiralyaawe oSotoma, nto aamwiira etthu emosaru. Vano, Owo atthikaru ni wira siiso ntoko Owo saawiireny'awe aSamariya ni aYuta, munimwaamini wira Owo ti Mesiya ori vaava mpaani mu ohiy'ula? Nvenxe matata mwaira wira, "Owo aira-ru etthu emosaru, Miyo kinoomwaamini."

Ahe, mwah'ola mmosa waahaana olakiherya. Mwakhalaru a xariya mmurimani mwanyu, yaahaana olakiherya.

²⁴⁷ Vano, hiyo nri va, oowaili vathi va elaphelo wira khaninsuwelana mmosa ni mukhw'awe. Vaareera. Vano, Muluku akuupululela vale etthu mwiiraly'anyu, munsuwelaanyu wira nkisuwenle etthu ya yeeyo, wala etthu emosa—nyuwo munthokihaanyu wira mwiire, miyo ehinsuwelaaka hat'etthu, wala etthu mwaha wa nyuwo, ole okhanle muxankiho anyu, ele ekhanle eretta anyu, mukattyamiho anyu, wala—wala *etthu ekina*, etthu ntoko yeeyo, nto nyuwo mwaamwaamini wira ti Yoowo?

²⁴⁸ Eyo yaarowa. . . ehaana orwa mwa enamuna emosa ya owerya. Mwaaminiru wira iwo owerya Wawe, vano munimwaakhela iparackha Sawe. Mwaaminikiru wira iwo owerya mukina, ahe, eyo ti yawinyu nyuwo ni Muluku. Munnona? Nkaarowa osuwela etthu yaarowa okhumelela vale.

²⁴⁹ Vano, Owo aira-ru, munookupali, Owo airaru mwa enamuna emosaru Owo siiraly'awe mBibiliani, ntoko Owo ni muthiyan'ole eemenle, alavulaka, nyuwo mwaamwaamini, munimwaamini, muhano? Nto ekereja ehimnye wira yaamwaamini. Vano—vano ola okathi wa Muluku wira. Munnona?

²⁵⁰ Vano, hiyo nri va, alakela imiya tthaaru wala imiya xexe, atthu imiya tthaaru, khula enamuna, akilaanthe va ohiy'ula. Vaareera. Nkawehani va, ohoolo w'atthu imiya tthaaru, miyo koowoona atthu ikonto imiya xexe, thanu oBombai, oHintiya, moone, ikonto imiya piili ni ikonto miloko mithanu na miili ni athanu oDurban, wAfrika du Sul. Khenivonyeya. Owo Mulukuu.

²⁵¹ Vano, Owo awerya wooleelani ele mukhanly'anyu, vekeekhai Owo onniwerya. . . mwaamwaamini, nyuwo munoosuwela yakhala ekeekhai wala nnari. Owo aalavulaka, munoosuwela yakhanle-ene ekeekhai.

²⁵² Ahe, yakhala vale, ni Owo onahimya ele mukhanly'anyu, wa ele enrowaanyu okhala? Mwaamuwerya waamini yeeyo

vookhweya nto, khamwaawerya, Owo aahimnye-ru yeeyo? Vaareera.

²⁵³ Mwali, vano, kihinatoko aka omoona kookhalaru. Owo t'oyevaxa okivikana miyo, ooyariwa miyaakha soorakamelana, khino imiilya soorakamelana, ni emaara ahu yoopacerya okumana. Masi vano, miyo kinlavula n'uwo paahi wira kithokose erooho awe, siiso ntoko Pwiy'ahu saamwiireny'awe muthiyana veehimeni. Ni kinnoona vano wira owo mulipa-oowaamini, ni munoohaaxeya. Nyuwo muntthuna nivekelo mwaha wa enamuna emosa ya eretta ya esapala murin'anyu. Eyo yakhala ekeekhai, nvenxe ntata nanyu. Munnaamini?

²⁵⁴ Vano, miyo kinikhala, khula muthukumano, miyo kinoona wira, ookhala ohimnye wira, "Owo orimwaanyiherya eyo." Vano, nyuwo khamunwerya wiipithiha miyuupuwelo sanyu vano. Owo ori vaava. Uh-huh. Munnona? Nyuwo muniira. . . Vano, nyuwo. . . Miyo nkaanyihenrye eyo. Mphavele osuwela.

²⁵⁵ Nyuwo munikhala ntoko okhalana ephitaanelo ni Erooho ya Muluku. Vano, nkinsuwela etthu koohimenry'akani. Owo nkaari miyo. Owo aari Yoowo. Eri mukaravatooroni vale. Kaamuwerya otthikeliha eyo ottuli ni osuwela ele yaari-aya, masi nkisuwenle vano.

Masi nyuwo mwaaminiru paahi wira miyo ka profeta Awe, wala, murumeyi Awe! (Nsina nlo ninnaakwattula atthu, moone.) Tivo, mwaaminiru paahi ni murim'anyu wothene!

²⁵⁶ Ayo, mulopwana, eyo eretta ya vasapalani. Ti yeeyo koohimenry'akani. Ni—ni va yookhala etthu ekina. Onnoowereyani muru, owereya muru vootepaxa. Vano nto, aakhala anamwane aili kiniwoonaaka wira muntthuna wira evekeleliwe. Nto muulupale aya onihaaxeya ni eretta yo wuukhuwa. Mukhaani aya onihaaxeya ni etthu ehilonke mukhootwani, owo muuwe mukhootwani. Muluku akileela vale ole mukhanlyanyu, eyo yaamurowa owaaminihani vano ni murim'anyu wothene? Moosuwela wira nkinoosuwelani, masi Muhano Bowman, rowakani owaani. Mmwaamini Pwiya Yesu Kristu ni mukhale mukumi. Muluku ooreeriheni, murokor'aka.

²⁵⁷ Munnaamini? "Mwaatthu, naaphavela omoona Yesu." Vano, mwaamini paahi. Vano, va ori mulopwana. Miyo nkinatoko omoona kookhalaru. Owo khino ohinnuwa vakhani okivikana miyo. Hiyo n'amalapo mmosa ni mukhw'awe. Ni miyo nkinoosuwelani, ni nyuwo khamunkisuwela. Masi Muluku awerya okileela etthu, wala. . .

²⁵⁸ Vano, mukhale oomaala saana. Ohikhale hata mutthu oneetteetta. Moone, nyuwo mwa irooho. Moone, khula mmosa a nyuwo eroohoo. Nyuwo munnisuwela eyo? Nla ntata naka, ntoko miyo sihimalyaaka nsana ohiyu, nla ntata naka; ela ekatha aka; nla naaru naka; ela ephula aka, maitho aka. Masi miyo k'ani? Moone, eyo etthu eri yawaka. Miyo ka eroohoo.

²⁵⁹ Nyuwo muri va mwaha wa mutthu mukina. Nyuwo khimukhanle mwaha wa yeenyu. Mutthu mmukhalenle-anyu va khonreere owereiwa voohirukuneya. Awo arina eruku ya mookhwaani vasulu vaya. Owo kankuru. Awo khakhanle vaava. Awo ari oPhoenix, Arizona. Rowakani, mwaamini, nto awo anoovona. Vaareera. Ntoko saaminni anyu, ekhale siiso wa nyuwo. Muluku ooreeriheni.

Mwaamini paahi. Muhihoverye. Munnaamini?

²⁶⁰ Ankhi nyuwo mukilaanthe vo, muhano, vakhaterani? Enoomalaru woohakalalihani, etthu ehiira, vaavo vo, khiyiirale? Muhan'ola okilaanthe va ni ekhasako awe, ompaathale ni ntata nawe osulu, onikiweha miyo *siiso*. Ayo, vaava va wookiseryani. Munnaamini wira ekuru iyo ya ephome enimoohiyani ni munookhala saana? Vaareera, nto. Mukeleleke ohooolo paahi. Munooowerya okhalihwiwa mukumi.

Owo okwanyale exeeni? Owo ori emeeturu thanu na xexe wa miyo. Owo omukwanyale Namukuttho Muulupale onwerya okwanyyiwa ni owereya wa iretta sahu. Ti Yoowo.

²⁶¹ Hiyo n'amalapo mmosa ni mukhw'awe, mulopwana. Miyo nkinoosuwelani. Nyuwo, khino, khamunkisuwela, woohikhala ni nsina paahi, wala mwaakilaanthe vamuthukumanoni nipuro nlo khukoona. Ti, masi osuwelana mmosa ni mukhwaawe, hiyo khaninsuwelana mmosa ni mukwaawe. Hiyo n'amalapo mmosa ni mukhwaawe.

²⁶² Vano, Apwiya Yesu yakuupululela etthu ya nyuwo munsuwelaanyu wira miyo nkisuwenle, nyuwo munoomwaamini Owo okhala Mesiya? Kahi miyo, masi Owo onvara muteko mwa miyo. Miyo paahi, yoovaha, wira kiivahererye wa Erooho Awe paahi, ni miyo kiri ota w'ephiro nto Owo t'onlavula. Munnona? Ahe, Owo ooleelani-ru, munooosuwela sinto ekeekhaii wala nnari, kahi siiso? Nyuwo munihaaxeya, etthu evonyeiye mmitikani. Wiipiwa mitika. Eyo ekeekhaii voolikana.

²⁶³ Masi kinnimoona muthiyana okhumelela, mutthu muninkelelaanyu. Ti munn'inyu. Owo orina eretta ya mmuruni, nto nyuwo muninkelela yoowo. Eyo ti SISO ANIHIMYA T'APWIYA. Eyo ekeekhaii, nvenxe ntata nanyu. Munnimwaamini Pwiya Yesu vano? Rowakani, mwaakhele ele nvekenly'anyu.

Mwa Nsina na Pwiya Yesu, munvahe.

²⁶⁴ Ehaali anyu? Mukilevelele. Miyo nkaari ni mwi-... ohiisuwela mmansaka, miyo kaaweha Waarya. Nkaari ookupalixa. Kinnoona nipuro Owo weemenlyaaya, masi nkaari ookupalixa etthu—etthu ekhumelenle. Munnoona? Moone, miyo—miyo kihaana otthara Eyo paahi. Moone, miyo . . .

²⁶⁵ Vano, moolikana wira mooperariwe. Masi munnaamini wira Muluku aamuwerya woovonihani yeeyo? Mookhalana miyuuwe

miraru mapuro mararu oovirikana. Miyo kooleelihani-ru seiyo, enimookhaliheryani? Mmosa aya ori vammilo, mmosa aya ori voomwilimwana wa othiyana, ni mukina ori vathi va moonoo anyu woolopwana. Muhano Macintosh, nlo ti nsina nanyu, rowakani owaani mmwaamini Pwiya Yesu Kristu ni mukhale mukumi, mwa Nsina na Pwiya Yesu.

²⁶⁶ Munnaamini? “Mwaatthu, naaphavela omoona Yesu.” Ahe, ti Yoowo, ti moonelo ole. Vano, eyo khenlipiherya wira ekereja ya Pentekosite ennoona eparakha eyo, owo ti Pwiya Yesu, munnoona? Owo onvara miteko imosaru. Owo nkihiyo miyo.

²⁶⁷ Miyo nkinaasuwela atthu ala. Muluku Wirimu onnisuwela eyo. Miyo nkinaasuwela atthu, masi Muluku onnaasuwela. Nyuwo mwaaweryaka waamini, itthu sothene sinniweryaneya.

²⁶⁸ Muthiyana orina nleeso nawe osulu vo. Waarya iwo nlelo ori vasulu wa muthiyana. Owo ti muthiyan’ole, aari vaplataforma naanaano va, ovenxale nleeso nawe? Mwaari nyuwo va?

²⁶⁹ Nnari, ori—ori ottuli wanyu. Muhano ori ottuli wanyu orimwiipiwa makhonyokhonyo, okilaanthe iwe wookiseryani, mmwaamini Pwi-...ti yeeyo, munna. Amen. Munnaamini ni murim’anyu wothene? Munnaamini wira wiipa iwo wa makhonyokhonyo onimoohiyani? Munnaamini? Vakhala wira mwaahiipa makhonyokhonyo, muttikinye ntata nanyu so wira atthu esuwele. Nyuwo mwaakilaanthe vale mwaaminiki, nto muthiyan’ole khurwa ni mureeriho. Vano, rowakani owaani mukhale mukumi. Yesu Kristu ohoovonihani. Owo okwanyale exeenii?

Miyo nkinoosuwelani. Hiyo n’amalapo mmosa ni mukhw’awe. Ti yeeyo, mwaanvenxa matata anyu ni miyo?

²⁷⁰ Oh, vaakhanle wira atthu...Nyuwo mwaamwaamini paahi, etthu yaarowa okhumelela naanaano va! Waamukhala muhakalaliho ommwareela Olimani nno Onkela nsuwa waarowa omwareela mulaponi mothene. Vaakhanle wira mwaaniwerya paahi osuwela etthu enwehaaka! Miyo—miyo kinroromela, vekeekhai, miyo—miyo koophwanya ocaleliwa vamaithoni vanyu ohoolo wa Muluku. Miyo kinooleelani ekeekhai, ni Muluku onnilipiherya wira eyo ekeekhaii. Etthu Muluku onthunaawe wira vaava mukereja mu ohiy’ula! Ti yoosuweleya. Masi miyo—miyo kinootteettheya. Munnona? Nkawehani ntata naka paahi. Munnoona oviheriwa nno? Eyo paahi...Akavi ansuwela wira eyo ennootteettheiha?

²⁷¹ Muthiyana mmosa aahikwanyanya nlaya Nawe, Owo khuhimya wira ikuru saahikhuma mwa Yoowo, ni Owo aari Mwaana a Muluku. Vano, miyo ka natampi koopoliwe ni mahala. Daniyeli aahoono yoowoona emosa; khimuxankiha vamuru vawe mahiku manci-ene. Munnona? Mwaamini paahi.

²⁷² Vano, mulopwan’ola, hiyo oowanli ninihimya wira n’amalapo mmosa ni mukhw’awe, kханinsuwelana mmosa ni

mukhw'awe. Masi Muluku onninsuwela. Vano, vakhala wira Owo onniwerya okuupululela etthu ya nyuwo, wira—nyuwo ensuwelaanyu wira nkinsuwela, yaamoosivelihani wira nyuwo mwa...? Akina a nyuwo, hata eliinya ya mavekelo, mapuro othene, mwaamwaamini ni murima anyu wothene?

²⁷³ Bibilia ola oniphwanyaneya va, ni mulopwan'ola ni miyo neemenle va, hiyo khinnatoko okumana khalayi nookhalaru, ni matat'ahu osulu, hiyo khinnatoko okumana khalayi. Vano, Yesu ohimnye wira Owo aanisuwela miyuupuwelo saya. Akavi ansuwela yeeyo? Akavi ansuwela wira Bibilia ohimnye wira, "Masu a Muluku t'otepexa wiitha onvikana xoowa oniitha ninno ni nno. Ni nave-tho Annilamula miyuupuwelo sa mmurimani, ni sintthunaaya ni miyuupuwelo sa murima ni muupuwelo." Bibilia onnihimya yeeyo?

²⁷⁴ Masu a Muluku, ahe, exeeni yaari Masu a Muluku? Yesu. "Wopaceryani naari Nsu, nto Nsu naari ni Muluku, ni Nsu naari Muluku. Nto Nsu nihiipaka erutthu khukhala ni hiyo." Nto va Masu annooniheriwa mw'erutthuni mwahu. O Muluku! Vekeekhai nyuwo khamunrowa ohaleela ela, tthiri, tthiri. Mwaamini.

²⁷⁵ Yoovaha paahi, mulopwana, kiphavelaka wiitthyuuwa mmansaka ni othokosa erooho anyu. Hata ekhalaka yootikiniha, miyo kinniwoona awo oru...atthu yaataleleiyene ookhwa. Ofilantiya, mapuro mararu wala maxexe oovirikana miyo koowoona okhala waka, ni Muluku aamuhiya erooho aka okihiyaxa mpakha miyo okhuma kirowaka mmuttettheni, ni ovara erooho eyo, n'uhokoloxerya-tho wa mutth'uwo. Eyo ekeekhaii. Muluku Wirimu onnisuwela wira ekeekhaii. Munnona? Vano, okhalaka wira eri mwa nyuwo, ni nlelo muri vathi va otaphuwa w'otthuna, muhaana wira. Ni nkaakhanle wiiraka eyo woohikhala wira yaari yo—yooruma ya Muluku enikooniha yoowoona.

Yesu ohimnye wira, "Miyo nkiniira hat'etthu ehikhanle wira Atithi anookooniha."

Vano nyuwo mwaamwiira, "Owo onoowerya owoonihani wira miyo koovona, wala etthu...?"

²⁷⁶ Owo onniwerya okooniha ole okhanle mukattyamiho anyu, masi nyuwo muhaana okupali, waamini wanyu. Miyo nkaawerya owoopolani, nnakhala nkaarowa owerya woovonihani. Ehiiriwa. Masi Owo ori vaava vano wira ooniherye wira Owo Muluku mmosaru yoole olempe Masu. Munnona?

²⁷⁷ Vano. Ayo, khimunreere owereiwa, muntthuna, orowa oxipiritaali meelo mwaha wa elapaha. Ti yeeyo. Munnaamini wira ka profeta Awe, wala, murumeyi Awe? Munnaamini? Munnaamini wira mwaamuwerya...munoorowa okhala mukumi, n'urwa owaani naanaano, munoorowa okhala saana? Munnaamini? Kooleenleni ole mukhanlye-anyu, eyo

yaamookhaliheryani? Vaareera. Walter Kaiser, rowakani, ni mwaamini ni murima anyu wothene. Ti yeeyo. Mwaamini ni murim'anyu wothene. Mwaamini paahi—mwaamini.

278 Mukilaanthe vo, mulopwana, nwanre efaato yoottweelela, mwaarina eretta mmasasuni mwanu nave. Mwaaweryaka waamini. . . Ayo. Munnona? Ayo, mwaarina eretta ya nsasu. Kirooweha Waarya iwe vasulu vanyu, omalakarū ovonihiwa ni ele owo aarin'awe vale. Owo aarina eretta ya nsasu nave ya muthinto mmosa. Eyo evinre vasulu vanyu. Waamini wanyu woomaliha. Rowakani owaani, mukhale mukumi. Waamini wanyu onnoovonihani.

279 Okilaanthe ottuli wa muthiyan'ola, mukina okiwehaka vaava va miyo naanaano va, owo aarina mukattyamiho wa nsasu. Owo kankuru, nave-tho mmuthanani. Mwaamini ni murima wothene. Mwamuthiyana a maihi oottweelela, yaari ekeekhai, nvenye mweemele. Nvenye mweemele. Miyo ka mmalapo voomalela wa nyuwo. Ti yeeyo, muttikinye ntata nanyu. Ti yoowo waari mukattyamiho anyu. Vaareera. Kinkuxa elamulelo. Munnaamini wira ela ekeekhai?

Vano mwa Nsina na Yesu Kristu, miyo kinnimpwapwela xetwani uwo.

Rowakani ni mukhale mukumi.

280 Munnaamini wira mukattyamiho owo wa murima onookhuma ni munoovonihiwa, vano munoorowa owaani, ni murima wothene? Vano rowakani, ni mwaamini ni murima wothene, ni mukhale mukumi.

281 Rwaakani. Munuupuwela exeeni? Munnaamini wira mafuwa animoohiyani, ni munoorowa owaani, muhiye okothomola? Vano rowakani, mwaamini ni murim'anyu wothene, ni mukhale mukumi. Nyuwo mwaahikhale. . .

282 Murwe, munna. Xeeni onanaraxiwa? Munnikhalaka oonanaraxiwa okathi munci-ene. Vaareera. Moovonihiwa vano, rowakani mwaamini ni murima wothene mukhalahiwe mukumi. Vaareera, mulopwana. Ti yeeyo eniwuukhulani.

283 Vaareera, muhano. Rwaani. Munnaamini ni murim'anyu wothene? Muxankiho anyu wa muthana woovonihiwa. Rowakani, mwaamini ni murima wothene, mwiire, "Kooxukhuru, Pwiya Yesu."

Oowuukhuwa murima, munnaamini wira Owo onnivihiwa? Rowakani, mwiire, "Kooxukhuru, Pwiya" ni nvenihiwe. Mwaamini paahi. Ti yeeyo tu murin'anyu wira.

284 Nkawehani va, muhano, wa miyo. Nyuwo munnaamini wira miyo ka profeta Awe? Muxankiho wa muthiyana munkhalanaanyu, muxankiho owo wa athiyana, ti yeeyo, murowe nvenihiwe, mwa Nsina na Yesu.

285 Okathi vakhani paahi. Yookhala etthu evinre vamuthukumanoni. Ayo, mulopwana mmosa okilaanthe ottuli nno, onihaaxeya mwaha wa mukattyamiho wa muthana, onikiweha miyo. Munnaamini, mulopwana? Vaareera. Mwaakhele openuwa wanyu. Mukhale mukumi, mwa Nsina na Yesu Kristu. Mmwaamini Muluku.

286 Muthiyana okilaanthe ottuli wa mulopwana ole orina tiyapeeti. Munnaamini ni murima wothene? Nvenye, mwamuthiyana oottweelela maihi owanre ilumeta. Nyuwo mookwannya Etthu emosa, kahi siiso? Nvenye; mukhale mukumi. Muroweke owaani, ni mmwaamini Pwiya Yesu Kristu. Mwaamini.

287 Kahoohimenrye-ni etthu, owiixaatheryani matata paahi, nyuwo mwaamurowa...? moosuwela...? munnaamini wira eyo Erooho Yoowaarya? Murwe va, mukihiye koopweheryeni matata.

Vano, mwa Nsina na Yesu Kristu, nvonihawe.

288 Vano, murwe. Enooniherya paahi moota anweryaaya wira. Munnona? Moosuwela wira koosuwela etthu evonyeie ni nyuwo. Masi kaahihimye etthu, enookhala saana, owiixaatheryani matata? Munnaamini? Ola mureeriho wa enamuna emosa. Mwaamini, nto eretta anyu ya murima enoorowa. Owo aakitthuna miyo, ohimya yeeyo, vancie-ene.

Vaareera, murwe. Mwa Nsina n'Apwiya Yesu Kristu, nvonihawe, murowe owaani, mukhale mukumi. Mwaamini vano, muhihoverye.

289 Mwaamuthiyana, okathi vakhani ovinre okathi waalaley'aka, nyuwo mwaakilaanthe ottuli iwe mukiwehaka. Nyuwo murukunuwa, munweha muthiyana mmosa; moonelo mmosa vekeekhai wootikiniha koorwelani, okathi nyuwo, kilaleyaka, kihimyaka etthu mwaha wa Pwiya Yesu, vanci-enexa nihiku okathi olavunle-aka mwaha w'oSotoma, mwaahikhalana moonelo wootikiniha. Munnuupuwela yeeyo? Owo p'ukathi muxankiho anyu wa muthiyana ovonihwaaya. Vano, muroweke owaani, mukhale mukumi.

290 Munnaamini ni murim'anyu wothene? "Mwaatthu, naaphavela omoona Yesu." Owo mmosaru nsana, olelo, ni mahiku othene? Nvenxe matata. Vano, kintthuna kookoheni, akavi a nyuwo mukhanle oowaamini? Muvahane mukhono so. Vaareera.

291 Bibilia ohimmye ela, "Ithoonyeryo iya sinimwaatthara ale anaamini." Munnaamini yeeyo? Vakhala wira, ela, etthu Owo ohimmy'awe wira, "Miteko Miyu sinvaraaka nave-tho nyuwo munoovara," vano mwiixaatheryane matata mmosa ni mukhw'awe. Muhiivekelele mmansinyu; munvekelele mutthu ompwehenryaanyu matata. Mwiixatheryane matata mmosa ni mukhw'awe. "Ithoonyeryo iya sinimwaatthara ale anaamini."

²⁹² Osulu mpithela osulu iwe, mulopwan'ole okilaanthe vale ni mukattyamiho wa mmavoro, okilaanthe epantte ya moonoo woothiyana, mwaamini ni murima wothene, mulopwana. Ti yeeyo. Muluku onnoovonihani, onnookhalihani mukumi. Mwaamini. Mwiixatheryane matata mmosa ni mukhw'awe ni nvekelelane mukina ni mukwaawe vano.

²⁹³ Tith'ihu a Wirimu, hiyo ninnimooneliha Satana vano. Owo namawoka, ni ohooniheriwa ohiy'ula mwa owerya ni ohihimuwa wa Yesu Kristu.

Satana, mooxinttiwa ekhotto. Mukhume mw'atthu ala. Mukhume. Mwa Nsina na Yesu Kristu, mukhume mwa yaawo.

²⁹⁴ Miyo kinninvahererya khula mmosa a nyuwo onimwaamini Yesu Kristu, ni onsuwela wira Owo onnimaliherya Masu Awe, onaamini wira eyo Erooho Awe va vano, mwaaminiru ni murim'anyu wothene. . . Mulipa-oowaamini oowiixaatheryani matata, yeeyo Bibilia ohimmyaawe, Yesu ohimmyaawe wira, "Ithoonyeryo iya sinimwatthara ale anaamini." Owo ti Muluku mmosaru yoowo ori va aisuwelihaka Mmansawe wira Owo ti Mesiya anyu a Pentekosite.

²⁹⁵ Khula mmosa a nyuwo onrowa omukupali Yoowo vano okhala Mpenuxa anyu, hata wira muri vayi, nvenye mweemele mmukupali Yoowo okhala Mpenuxa anyu. Miyo kinromola ovonihiwa mwa Nsina na Yesu Kristu. Munvenxerye matata Yoowo vano mmuttotopele. Amen.

Kinoomuttotopela Yoowo. Kinoomuttotopela Yoowo.

Mmuttotopele Yoowo paahi.

. . . Kinoomuttotopela Yoowo,
Mmuttotopele Mwaapwittipwitthi oiveliwe
anatampi;

Oh, munvuwihe Yoowo atthu othene,

Muluku ooreeriheni.



MAPWIYA, NAAPHAVELA OMOONA YESU EMK61-0208

(Sirs, We Would See Jesus)

Mutthak'ola wa Munna William Marrion Branham, opaceryawene olaleeriwe ni Enkelesi Namararu ohiyu, mahiku yeeteka 8 mweeri wa Feveiro, 1961, wAsempelaya A Muluku Oopacerya A oLong Beach oLong Beach, California, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org